



08757

廣名將傳卷十八

古閩黃道周石齋註斷

劉基

劉基字伯溫處州青田人也元末舉進士揭曼碩見而奇之曰此魏徵之流也常偕游西湖西北有異雲起光耀湖中衆以爲慶雲欲賦詩紀之基熟視良久因喜而語人曰此天子氣也應在金陵後有王者起我當輔之因棄官歸青田或說曰今天下擾擾以公才略下括蒼

廣名將傳卷十八

明

一 海山仙館叢書

並發州畫江而守之此勾踐之業也基曰吾平生忿谷珍士誠所爲豈效尤乎且天命有歸姑待之及朱太祖取婺州定括蒼基乃指乾象曰此天命也會太祖使孫炎來聘因謂人曰吾西湖之言驗矣卽日同章溢葉琛間道走金陵旣見太祖陳時務十八策太祖大悅俄陳友諒傾國入寇太祖欲禦之衆恒怯不決有請背城借一者有以鍾山王氣請奔據者有勸納款者基後至獨張目不言太祖趨問之基乃請先斬納款及奔鍾山者太祖又問計將安出基曰賊驕矣誘之深入而伏兵徼

取之易耳取威定霸在此一舉納及奔何也太祖從之果誘破友諒盡覆其衆時太祖初稱吳國公而中書省猶設奉韓林兒爲小明王基怒罵不拜曰何爲奉牧豎因爲太祖陳天命所在太祖感悟始定征討大計及師攻友諒皖城未下基曰彈丸地何足久勞師友諒膽破矣急進薄江州彼必遁江州下皖城焉往兵至江州友諒果遁都督馮勝攻其城基授一赫蹏封曰夜半出兵至某所見某方青雲起卽設伏頃有黑雲起者賊伏也勿輕動日中旻而黑雲漸薄回與青雲接者賊歸也

廣名將傳卷十八

明

二

海山仙館叢書

啣枚躡其後擊之可盡擒也勝讀而未敢信已而青雲黑雲起具如基言遂奉而破賊取其城基以母喪歸至衢適苗軍叛殺守將胡大海耿再成等衢人洵洵迎基入城衆卽帖伏因移書諸屬邑俾固守俟邵平章之兵而悉誅諸叛將旣而治喪畢復騰書宣太祖威德以示方氏方氏遂請降俄驛召還道過建德而張士誠來寇李文忠時爲帥奮欲擊之基使勿擊三日後必走走而尾之可盡擒也三日基登城望曰賊走矣衆見其壁壘旗幟如故且聞嚴鼓聲莫敢發基復趨之至則空壁所

畱者老弱追而薄之東陽悉獲其衆基入見太祖問曰
吾欲取陳友諒張士誠孰先基曰士誠自守虜耳陳氏
據上游竊名號無日忘我不宜久蘊崇之取陳友諒則
士誠囊中物矣太祖以爲然會友諒復攻洪都太祖遂
率師迎之遇於鄱陽湖大戰五晝夜基密言于太祖請
移軍于湖口期于金木相犯日決勝太祖從之方鏖戰
時基在御舟忽躍起大呼太祖驚起但見基兩手揮之
連聲曰難星過可更舟太祖急更舟坐未定而前舟已
爲敵礮擊碎矣由此遂平陳氏基嘗見日中有一黑子

廣名將傳卷十八

明

三

海山仙館叢書

言于上曰東南當失一大將忽報參軍胡琛攻福建爲
陳友定所殺他日太祖謂基曰吾夜夢三人共弁一血
帽何故基曰三人首弁血帽衆字象也此得衆之兆越
三日海寧果以城降熒惑守心羣下皆惴惴以太祖且
有加僂基密奏宜下書罪已以回天意太祖許之衆乃
安後太祖既定天下論功封誠意伯旣而寢疾給驛舟
護歸青田亡何竟卒卒之前以平生所習天文秘書封
授子璉曰服闋亟上毋令後人習之

斷曰

劉基何品魏徵之流畫江以守勾踐可謀基曰不可
天命已優谷珍之事吾豈效尤金陵旣立徵聘是求
牧豎不奉驕賊何憂誘之深入盡覆其偉馮勝戰蹟
駭雲而收衢苗叛逆基入而休士誠守虜陳據上流
況竊名號宜先斷頭難星將過急請移丹有謀皆應
無言不酬上識天意故爾優游論功封伯高遜一籌

徐達

徐達鳳陽人精通韜畧徐壽輝劉福通張士誠皆慕而
欲起之達不赴曰帝星旺在本鄉豈宜遠適他人未幾

廣名將傳卷十八

明

四

海山仙館叢書

太祖詣其廬與論驅羣雄以救生靈之策達曰定天下
在德不在勢今元勢雖強意在必亡諸雄若徐壽輝強
而自暴張士誠驕而自奢劉福通行無紀綱方谷珍偷
居自逸明玉珍恃險自滿皆無志于生靈未足定天下
誠能以仁義道德爲心不貪不殺爲本傾府庫以固士
民則天下不足慮也太祖聞而忻然遂請與至濠又問
戰勝之道達曰上勝者以仁中勝者以智下勝者以勇
三者不可缺一太祖曰公之雄才大畧見于議論有古
名將風遂推授爲帥首因與謀渡江取金陵正慮無舟

適巢湖水寨軍師俞通海等率兵萬餘船千艘來降遂
渡江東下采石乘勝取太平時元將陳也先康茂才水
陸來犯達令湯和擊其水軍鄧愈擊其陸軍遂擒也先
及聞也先之弟兆先集兵屯方山達曰也先旣擒兆先
必約倪文秀復擁舟師結砦采石以窺我太平矣乃東
取溧水以阻其援復設疑兵以分其勢而以正合與戰
及戰又出奇兵以擣之由是文秀遁去兆先亦擒康茂
才率所部來降進圍金陵十日遂鼎新于斯焉達將兵
取鎮江太祖戒之曰爾能體我心城下之日戒士卒毋

廣名將傳卷十八 明

五

海山仙館叢書

焚掠毋殺戮達受命至鎮江元平章定定遁去卽克其
城兵不血刃號令嚴肅城中晏然太祖喜曰吾用徐達
近王者之師復命達取高淳丹徒等處守將扈文明用
拐子馬以拒王師徐分兵與康茂才攻之仍令善用長
鎗者皆立于軍前以刺其馬善用弓弩者次之以射其
人文明戰敗遂以城降太祖諭達曰偽漢王陳友諒竊
據江左若不剿平則兩河關陝燕山之地非吾所望漢
若就擒則吾師乘勝長驅胡元可席捲矣乃親督達等
分舟師爲兩翼夾擊大破之友諒懼遂挈妻子奔武昌

達征武昌聞祝宗康太以南昌叛達因旋兵討之斬宗
太南昌平太祖喜曰南昌楚之重鎮吳西南之藩蔽我
得其地是去陳氏右臂而張氏亦齒寒矣張士誠北寇
壽春太祖親往援之達爲前鋒張氏敗北命達移師圍
左君弼於廬州會陳友諒寇豫章太祖曰爲一廬州而
失南昌非計也遂命達釋廬州之圍歸整舟師以解豫
章之難友諒東出鄱陽逆戰遇于康郎山達身先諸將
敗其前鋒一巨艦賊降者千五百人太祖恐士誠乘虛
命達還守建康自是彼軍勢弱我軍威振矣旣而達率
兵取信州路時僞漢守將燕繼超擁兵四萬陣于龍虎
山下晝夜備禦達謂楊璟等曰山後有小路名通牛谷
竟衝城南角爾領兵潛伏山下勿動待我兵與戰彼見
我敗必空壁逐我汝等乘隙急攻破之必矣乃曉與繼
超戰佯敗走繼超果盡衆追之璟等急攻城勢不敵知
州梅天蔭遂以城降繼超遁於饒州友諒死子理仍據
武昌太祖不忍傷民欲招之達曰理初立人心未寧不
如一面以書招之一面興兵致討順則撫之逆則討之
一舉而兩得上然之以罪人爲使持檄諭之檄至理不

從竟殺其使遂命帥兵急攻以正殺使之罪理與將劉
勇屯兵益州以拒王師達令柳迂領細作數十人匿入
益州城燒其倉粟理無糧可守遂與勇棄城夜遁達先
設伏邀擊之漢兵大敗達與常遇春分兵六路進攻遇
春擒理武昌遂平捷聞太祖喜曰達此舉兵之奇者也
時襄陽守臣魏得光姚天儒畢榮駱貴等合謀嚴守曰
我等不奉陳理號令不屬胡元統轄不受張士誠挾制
不懼明玉珍侵犯所慮者金陵之兵然內多聚糧外多
守兵不亦另是一乾坤耶達率兵攻之不克夜於山下

廣名將傳卷十八

明

七

海山仙館叢書

間鄉人云金陵兵若於城四門外築高阜架礮攻打內
無土石填塞破之易耳達聞甚喜曉集諸將令軍士築
阜架礮四門齊攻復令俞通海俞通淵各領兵俟於東
西二門外以防賊遁計定搦戰火礮齊發城中居民火
焰漲天城門不能守通海等入城畢榮被擒駱貴戰死
德光天儒遁去襄陽悉平太祖欲討張士誠問於達達
曰張氏驕奢橫侈此天亡之時也所任僞將伯昇呂珍
之徒皆齷齪不足數居中用事黃蔡葉迂濶書生不知
大計若聲罪致討可計日而定太祖卽命達爲大將率

兵二十萬伐之由太湖直趨湖州一路戰勝遂進圍蘇城塞其六門時無錫莫天祐與張士誠爲聲援其部將楊茂春善遊水天祐遣之被達偵卒所獲達釋而勞之待以腹心茂春感而往來游水彼此所遣之蠟丸書皆報之故達陰得士誠天祐之虛實知城中食盡督兵急攻或曰姑蘇城蟹形齊門則其臍也遂攻克之縛士誠送京師籍其兵得二十五萬復圍無錫天祐遂降洪武元年太祖命達爲征虜將軍常遇春副之北取中原太祖曰諸將非不健鬪然能持重師有紀律得爲將之體

廣名將傳卷十八

明

入

海山仙館叢書

無如大將軍可專主中軍策勵羣帥古云將在軍君命所不受閫外之事卿其任之達遂帥甲士二十五萬出長淮入大河太祖至河南勞軍因與諸將共議取燕之事達曰臣與諸將仰仗天威渡河北行由衛輝彰德磁州邯鄲趙州及河間取臨清不數月而元主可擒矣伏願陛下駐蹕汴梁以爲犄角之勢太祖曰卿策可謂萬全及師至通州常遇春等三路繼至遇春沐英李文忠自河南由左路取沿河等處州郡湯和華雲龍康茂才朱亮祖自河南由右路取沿山等處州郡郭英郭子興

蔣顯自河南由中路水道俱至通州合兵以攻元主聞之大懼謂左右曰吾祖宗基業至今百年一旦棄去情實不忍然內無謀臣外無勇將且聞金陵將勇兵強王業已成不可敵者一也不尙殺戮民已歸心不可敵者二也劉基爲謀士徐達爲元帥四海悅服望風而降不可敵者三也爲今之計不如北走爲愈乃命淮王鐵木兒守燕京自集三宮后妃太子妃夜半開建德門出居庸關北去如上都八月達兵至大都不戰而克乃籍府庫封宮殿命將守之禁軍士不得侵擾人民安業市肆不易遠近悅服又畱兵三萬使孫興祖防禦北平遂率衆向太原擴廓鐵木兒乘驛馬遁去太原遂平旣而克臨洮克慶陽陝西遂平自是天下一統矣達爲將言簡慮精令出不二與士卒同甘苦財寶無所私婦女無所幸是時南取吳越北定中原東平齊魯西入關陝大抵皆達之功故爲開國功臣第一太祖嘗以漢之韓信宋之曹彬擬之卒封中山王諡武寧

斷曰

徐達識高所見自大帝旺本鄉首從其亞在德一言

廣名將傳卷十八

明

九

海山仙館叢書

已臻王化仁義爲心忍流于霸故凡用兵所征卽下
友諒手除士誠足跨刃不血流謀不尙詐正正堂堂
神驚鬼怕北取中原更添聲價不擾不侵如游於舍
比至通州元已北駕帝至蕩平兵閒馬暇謂之王師
實非假借

常遇春

常遇春定遠人多智畧勇力絕倫元末爲盜魁劉聚所
得四路剽劫遇春察其急鹵掠不圖遠終必無成會高
皇帝駐兵和州遂偕其私卒數千來歸請爲先鋒高皇

廣名將傳卷十八

明

十

海山仙館叢書

曰爾以饑來歸且有故主在遇春頓首泣曰劉聚盜耳
無能爲也倘得效犬馬之力雖死猶生高皇猶弗許旣
渡江抵采石元兵置陣磯上舟相去三丈餘適遇春飛
舸至高皇麾之遇春應聲挺戈一躍而上敵皆披靡大
兵乘之遂乘勝取太平始授遇春總管時高皇已渡江
而將士家屬輜重皆在北元中丞蠻子海牙擁舟師數
重界其中南北音信不通帝使遇春多張疑兵而自帥
正兵直擣之戰旣合遇春別操輕舸橫衝之海牙之舟
分而爲二左右縱擊大破之悉俘其精銳自是元扼江

之勢衰而南北通矣遂從取集慶路再從徐達取鎮江
徐達攻常州而降卒叛與張士誠合而圍達帝命遇春
以師援之表裏共擊大破士誠明年克常州取池州功
爲最又明年取婺州復有功未幾召還京師又從拔安
慶趙普勝小寨漢人聲言且援安慶遇春日賊必攻池
州言援安慶者疑我耳乃畱羸卒守城而出銳士伏九
華山漢兵果攻池州伏起俘斬萬人帝所任將帥其最
著者三人平章邵榮右丞徐達與遇春榮最爲宿舊且
善戰既貴而驕有所不得志輒謀伏兵置酒要帝飲而

廣名將傳卷十八 明

士

海山仙館叢書

劫之事發就縛帝猶語諸將曰吾欲宥榮死以慰勞臣
衆唯唯遇春獨前曰人臣而以反名寧可宥乎臣誼不
與之俱生帝乃飲榮酒流涕而饗之由是益重遇春張
士誠別將呂珍殺劉福通而奪據安豐連營水陸守備
甚嚴時汪元帥爲前鋒戰敗欲出去阻於塹殊死鬪卒
不可解而遇春以精騎橫突其脅凡三合三勝大軍乘
之遂進圍安豐帝與陳友諒戰于鄱陽湖帝舟適膠淺
而友諒大將張定邊遂奮而前欲犯帝帝危甚遇春乃
從旁射定邊中之始引退而帝舟得脫故破友諒歸飲

至策勲以遇春爲首丙午從徐達克泰州克高郵徇淮安徐宿皆下之丁未大發兵討張士誠直趨湖州之毗山與敵兵水陸鏖戰遂抵城下塞其六門晝夜環攻僞相張士信悉發境中兵爲援屯於舊館出我師之背遇春偵知之潛引奇兵由大全港而入結營東阡復出木石令填壅溝港絕其歸路士誠五太子及呂珍遂以舊館降遇春進圍姑蘇士誠欲突圍出至盤門奔遇春營遇春覺之分兵北濠以絕其兵後乃遣兵與戰良久未決遇春因撫王弼背曰汝以勇將名軍中能爲我取此

廣名將傳卷十八

明

三

海山仙館叢書

賊乎弼卽揮雙刀馳鐵騎往擊之遇春亦率兵乘之敵大敗走遂滅吳初帝議討中原遇春獻策欲輕兵直搗其腹心而肢節當自解帝雖持重未用然心服其勇至是乃命遇春爲征虜將軍副大將軍徐達率步騎以北因諭諸將曰摧鋒陷陣所向披靡無如副將軍遇春者然吾不虞其不能戰虞其輕戰耳且遇春大將也而好與小校爭能非吾所望也遇春頓首拜詔師旣出遂破汴梁走其帥李景昌元兵五萬陣洛水北將合戰遇春單騎突其陣敵以二十騎橫槊刺遇春遇春發一矢殪

其當先者大呼而入麾下壯士從之遂盡殺其二十騎
敵遂大潰河南下諸郡邑悉平上幸汴梁勞之曰將軍
北征不踰歲而下中原之半功亦大矣旣而復與大將
軍畧定河北進逼大都元主北走又移師徇太原元擴
廓帖木兒還師來救其鋒甚銳遇春與達謀夜劫之擴
廓果潰走太原下遂西過鳳翔元平章李思齊率所部
十餘萬奔臨洮鳳翔亦下帝乃遣遇春以所部馳至故
元都部署將士遇春謀元主在開平乃選部卒八萬騎
一萬取道三河抵惠州敗其將江文清於錦州獲士馬
千計次全寧與也速遇復敗之進次大興州遇春分千
人爲八伏徼其歸大興之守兵走伏發遂大敗之擒其
丞相脫火赤遂薄開平元主已前走追北數百里俘其
宗王三人及平章鼎位等斬之凡得將士萬人獲車萬
輛馬三千匹子女貨寶無筭師還次柳河川暴得疾卒
年僅四十帝爲震動擇塋地鍾山之陰追封開平王諡
忠武

斷曰

將軍遇春勇力絕倫初爲盜得奮起帝臣時帝與賊

采石爭津遇春舟至麾之進軍磯隔三丈一躍登濱
太平入掌敵衆潰奔鎮江安慶以次立勲邵榮旣反
已亂大倫帝如曲赦臣願殺身邵因就戮王法始申
帝舟膠淺定邊欲侵一箭射退方脫其迤士誠被逼
突出盤門春絕其後雖走失魂中原議討請搗腹心
言雖未用壯氣如雲破汴而北功實其勤師還暴卒
震痛殊深

李文忠

李文忠盱眙人父名貞母卽高帝之長姊也母死父不

廣名將傳卷十八

明

十四

海山仙館叢書

能自存遂攜文忠投帝於滁陽帝撫養及壯遂令以舍
人從軍策應池州時年僅十九遂奮擊破友諒之卒驍
勇爲諸軍冠無何率所部取青陽石埭旌德皆下之旣
而破苗獠於昌化獲婦女輜重甚夥文忠恐衆驕矜莫
有鬪志遂潛殺所獲而焚其輜重因激勵之曰患不力
戰何患不富貴衆感奮遂取淳安及嚴州時嚴新下城
壘未固而張士誠來爭挾苗獠之衆數萬人水陸掩至
文忠以輕兵從陸逆戰大敗之馘其首標之槎放於中
流水軍見而夜遁遂克諸暨苗將蔣英賊殺其帥胡大

海以叛文忠急擊破之蔣英走諸暨守將謝再興叛拔
張士誠寇我東陽文忠馳救復破之再興走文忠以反
側郡處兩寇間又與強寇接壤而練兵繕甲訖不可屈
始文忠所築逼諸暨而城者曰新城士誠之司徒李伯
昇悉兵二十萬來圍文忠往救之令去城十里而軍守
新城將胡德濟曰賊勢盛盍少避之以俟大軍文忠曰
俟大軍城爲彼有矣將在謀不在衆遂誓師而鼓之曰
彼衆而囂我寡而整且聞彼之輜重山積是天以富賜
若也勉之戰既合文忠橫槊引鐵騎數十乘高馳下直

廣名將傳卷十八

明

五

海山仙館叢書

出賊陣衝其中堅縱橫搏擊所向草靡賊駭亂相蹂躪
大軍乘之城中守兵亦鼓噪而出伯昇遂大潰斬首數
萬級擒將校七百人委棄鎧仗芻粟彌亘數十里伯昇
僅以身免旣而又受命統全浙兵攻張士誠將至杭杭
帥潘原明使其員外方彝納款文忠詰之曰兵未交而
遽納款得無爲緩師計乎彝謝曰王師所過秋毫無犯
杭之吏民鼓舞而慶有主自不能緩非敢緩也文忠乃
與飲而授之約束明日師人文忠立於麗譙下令曰敢
有擅入民居者斬有一卒下借民釜立磔以徇洪武二

年從開平北討進薄上都克之走元君獲其土馬萬計
及開平卒文忠代之詔移兵陝西與大將軍合攻慶陽
行次太原慶陽則已平而敵東攻大同甚急文忠曰兵
可無西也援大同便軍吏以爲疑文忠按劍叱曰聞外
之事吾得而專之敢言不援大同者斬遂出雁門次馬
邑敗其邏騎數千擒劉平章進次白陽門又擒四大王
前軍已去敵五十里而營文忠遽移之五里前阻水自
固敵夜率衆來劫毫不可動質明文忠望見敵益大至
乃以二營委敵俾死戰久之度其饑疲乃選精兵爲左

廣名將傳卷十八

明

去

海山仙館叢書

右翼奮擊大破之乘勝逐北擒其驍將脫列伯忒斬及
降者萬餘人窮追至莽哥倉而還三年進征敵左副將
軍與大將軍分道北討文忠以十萬人出野狐嶺降其
守將擒其平章又謀知元順帝殂太子愛猷識里達臘
卽位其衆離文忠喜兼程而進大破其候騎遂圍應昌
破之太子走獲皇孫買的里八喇后妃宮人暨諸王將
吏等及駝馬牛羊並玉璽金寶無筭捷聞帝大悅進爵
曹國公賜誥券世襲卒年四十六贈岐陽王諡武靖

文忠帝甥賴帝撫養舍人從軍勇已無兩旣破苗獠
獲輜甚廣恐無關心焚而激獎再破嚴淳加功加賞
蔣英再興旣成叛黨忠處其間與之接壤繕甲練兵
不爲少枉張將伯昇來圍莽莽破擊而奔土崩水洶
方彛款降吐誠慨慷進薄上都是其職掌急援大同
機權殊爽苦戰成功帝欣忠謹賜爵曹公誰不景仰

沐英

沐英定遠人父母早亡高帝收以爲子旣長數從帝征
伐加授昭勇大將軍以所部從下福建擒平章陳友定

廣名將傳卷十八

明

七

海山仙館叢書

洪武元年歸其沐姓上以徐達爲大元帥下溧水命英
統兵一枝先取傍郡以爲犄角之勢英曰溧水乃金陵
肘腋苟遲緩不攻必爲他日患今敵已離心有怯我之
意宜提兵轉出州後以攻其背大元帥統兵以扼其前
彼欲戰則我堅壁不出彼欲不戰則我師急攻之不一
月則城中糧盡矣此兵法所謂老師坐困自斃之道也
帝以英言論達達曰沐將軍筭無遺策不意少年有老
成之謀遂如英計竟以成功元將脫火赤等屯衆和林
爲邊患帝命英討之由亦集乃路渡黃河歷賀蘭山涉

流沙至其境去敵營五十里英下令分軍爲四一襲其背二掩其左右而自率驍騎當其前夜啣枚以進合而圍之脫火赤等駭惑不知所持皆俯首就擒擄其前部而歸十五年以征南右副將軍同穎川侯傅友德永昌侯藍玉下雲南兵至普安下之遂趨曲靖故元梁王密遣其將達里麻將精兵拒戰英曰彼謂我師疲于深入未有虞心及其無虞乃可破也於是倍道兼行將至白石江忽大霧四塞衝霧及江頃之霧霽則兩軍相望達里麻大驚以爲神兵飛至倉皇失措乃擁兵逼水而陣

廣名將傳卷十八

明

六

海山仙館叢書

友德欲渡英曰未可遣一軍泝流潛渡出其陣後吹銅角樹旗幟爲疑兵山谷間達里麻大驚急撤兵還禦陣亂英乃趨師渡江以猛而善泅者先之長刀蒙盾斫其軍敵却數里而後陣師旣濟英與友德麾兵大進矢石交發呼聲動天地戰數十合英縱鐵騎擣其中虛敵大敗生擒達里麻遂克曲靖梁王投水死右丞相觀音保舉城降英整兵入城秋毫無犯市肆不易九月出師迤下雲南僅百日英又引兵攻大理大理城倚點蒼山西洱海爲固而龍首龍尾二關最爲險要土酋段世以五

萬衆拒下關英自將攻之不下乃令藍玉王弼由汧水東趨上關而自以兵綴下關爲犄角之勢又令胡海將一軍由石門間道繞出點蒼山後攀木緣崖上立旗幟遲明下關兵見踴躍譁呼蠻衆驚亂英馬軍渡河水及馬腹遂斬關而入山上軍亦下擊之諸蠻腹背受敵遂克大理擒段世上命英畱鎮雲南且曰遲速之機宜自審度英定貢賦均力役疎其節目民夷大悅又以雲南土地甚廣而荒蕪最多請置屯田令軍士開耕以備儲蓄帝從之二十一年平緬蠻叛舉衆號三十萬戰象百

廣名將傳卷十八 明

九

海山仙館叢書

餘寇定遠英自將精銳二萬往討之旬餘抵賊營遣都督馮誠輕騎三百挑之賊驅萬衆乘二十象來戰誠與交刃獲一象而還英喜曰吾知賊不足破也卽命諸將多置火銃神機箭分將士作三行俟敵象近則前行之銃箭齊發若象未退則第二行繼之第三行又繼之銃聲不絕象必驚走然後以大軍乘之破賊必矣明日賊悉衆驅百象來戰象皆披甲背負戰樓若欄楯然挾大竹筒於兩傍置短鎗其中乘以勁卒藉以張勢英分軍爲三命馮陳領前軍甯正領左軍湯昭領右軍復申令

曰今日之事有進無退進而捷者一級必重賞退而衄者一隊必盡戮於是將士皆鼓勇而進陣旣交列我前軍火箭銃礮連發不已星流烟飛雷擊電走山谷震動象皆驚奔賊將昔刺亦勇猛殊死戰左師小却英登高望之命左右取左師之首來左師遙見一人拔刀飛騎而下麾衆復前英督戰益急三軍大呼而鏖不移時賊衆大敗斬首三萬餘級俘萬人生獲四十七象餘象皆被矢如蝟而死自是諸蠻驚服不復反英沉毅明達臨事果斷用兵如神賞罰明信得賜悉頒將士故能得其

廣名將傳卷十八

明

手
海山仙館叢書

斷曰

死力其鎮雲南也簡官僚剔奸蠹撫農興學墾田治水軍食充足教化大行雲南遂爲樂土後懿文太子死哭之極哀吐血卒年四十八封黔寧王諡昭靖

養子沐英長從征伐戰陳陳擒攻福福拔漂水行兵命從徐達請戰擾之達稱得法元將犯邊英分軍發襲背當前不令亂札俯首就擒消其狡猾往征雲南道遠路雜以我力疲憊于深撻大霧及江雷驚電撒日一戰轟天兵誅馬踏水死梁王里麻生拔大理二關

俱平一霎雷鎮雲南夷民安洽緬蠻恃頑倚象來壓
銃礮驚奔蠻方解甲功至封王可稱烈俠

鄧愈

鄧愈虹縣人元末從父爲盜旣而父死會高皇帝駐師
滁陽遂率所部自盱眙來附高帝授以管軍總管遂從
渡江克宋石取太平時元將陳也先合蠻子海牙之兵
凡數萬高帝禦之戰陣甫合而愈與徐達率奇兵繞出
其後大破之獲也先蠻子海牙走遂從下建康畧定溧
水破鎮江愈功最多旣而又克廣德州長鎗軍謝元帥

廣名將傳卷十八

明

三

海山仙館叢書

來攻愈出輕兵背城戰走之移鎮宣州又別將兵取休
寧績溪與胡大海合而攻下徽州旣而婺源之裨帥汪
同來降旣而進攻建德遂得建康以援嚴州又破元將
苗楊之兵于烏龍嶺又下饒州數與陳友諒角有功又
以兵取浮梁走其參政侯邦佐遂進圍洪都駐師臨川
之平塘時吳宏旣歸於帝帝因使以其兵取撫州撫州
帥鄧克明欲與宏拒而畏愈強乃遣人詐獻地以緩我
愈詎得之卽率勁兵間道夜馳二百里黎明下其三門
克明自度不免乃以分省印及所掠十八縣印詣愈降

愈遂定撫州後陳友諒圍洪都文正約束將士分門城
守愈得撫州門最爲衝要愈晝夜不解甲者三月餘帝
來援射殺友諒圍始解論功能守與克敵等出鎮襄陽
襄陽西接巴蜀南控楚北襟河洛烽火旌壘相望愈披
荆棘立軍府營屯練卒威惠甚著後高帝卽位吐蕃諸
部爲梗劫剽烏思藏貢使輜重愈分兵深入其巢斬首
捕敵以萬計捷聞帝悅使使召還至壽春而卒年四十
一追封寧河王諡武順

斷曰

廣名將傳卷十八

明

三

海山仙館叢書

鄧愈少時從父爲盜父死擇君戮力自効采石太平
一隨兵調也先被擒海牙遠跳溧水鎮江俱從征到
若問誰功多爲愈報廣德長鎗戰走沒道婺源汪同
降而識竅旣下徽嚴饒洪從召種種戰功實經非冒
出鎮襄陽威惠立教寧河封王允稱跨竈

俞通海

俞通海巢縣人元末江淮盜起因與父廷玉弟通源通
淵結寨巢湖以自守恐終無成聞高帝駐兵和陽因而
歸款時帝正欲渡江得通海父子水軍甚喜旣而敗蠻

子海牙敗陳也先而通海水軍之功居多因陞秦淮翼
元帥又攻鎮江又攻常州又攻宣城又敗吳呂珍皆有
功又從帝征陳友諒率舟師從風遡流而上至安慶帝
先陳陸兵以疑之命海等潛以精兵擣其水寨敵不及
支遂大破之已而陳友諒發憤盡銳攻南昌帝率通海
等往援之友諒解圍東出鄱陽湖逆戰通海乘風火焚
其舟明日友諒復以巨艦連鎖爲陣旗幟樓櫓赫然半
天我軍舟小怯于仰攻通海乃分調漁舟載葦荻置火
藥其中至晡時東北風起乘風縱火焚其戰艦數百艘

廣名將傳卷十八

明

三

海山仙館叢書

烟焰漲天十里之間湖水盡赤友諒之弟友仁友貴皆
焚死時通海小舟深入敵寨鏖戰久之不復見意其戰
沒也少頃忽飄飄繞出敵舟傍我師見之大喜躍呼奮
而前友諒遂大敗欲退保鞋山我師橫截湖面要其歸
路友諒不得出相持三日通海曰湖水有淺處舟難回
旋不利于戰莫若入江據敵上流彼舟若入卽成擒矣
帝從之敵因糧盡繞下流欲遁通海追擊之友諒中流
矢死班師還陞中書省平章事後從征浙江克湖州轉
戰滅渡橋中流矢死追贈號國公諡忠烈

斷曰

通海父兄當元解紐結寨巢湖聊以自守恐終無成
投明圖久帝正渡江舟師恰有蠻子也先因而敗走
細論其功水軍八九友諒鄱湖戰艦山斗通海從征
繞出其後潛載葦蘆火藥備手乘風燒之烟飛火吼
小舟環攻如鶯穿柳友諒箭傷喪心垂首師還進官
六公儕偶滅渡身亡勲名不朽

傅友德

傅友德宿州人驍勇多力擊刺騎射冠絕一時少從李

廣名將傳卷十八

明

三

海山仙館叢書

喜之爲盜李喜之敗遂歸明玉珍玉珍疑不能用走武
昌從陳友諒忽忽無所展及聞高帝舟師伐江州遂以
所部謁見于小孤山高帝奇之俾爲別將屬常遇春還
擊陳友諒于鄱陽湖友德操輕舟盪其鋒身被數鎗戰
益力手殺數百人復與諸將邀之禁江口友諒死師旋
第功爲最復從帝圍武昌城東南有高冠山下瞰城中
帝顧諸將曰誰能奪此山者賈友德卽率萬人先登一
鼓而奪之流矢中頰鏃出腦後復洞脇不爲沮武昌平
復從徐達下廬州西取夷陵又略衡州襄陽安陸俱取

之帝卽吳王位之元年友德守彭城而王保保之大將李二來寇勢張甚友德度兵寡不能敵詎其衆方肆掠因率步騎二千自呂梁渡直趨擊之李二有驍將曰韓乙者出戰友德單騎奮槊刺之墮馬師乘而進遂敗之友德度賊且復至乃開城門陣于野使皆卧槍以待聞鼓卽起李二果盛兵至輕我師寡競而囂友德鼓之士騰躍搏賊遂敗之縛李二以獻明年從大將軍破沂州斬其將王宣下青州元丞相也速率數萬騎來爭大將軍設伏友德以輕騎五百爲誘師敵追至伏而迴師擊

廣名將傳卷十八

明

三

海山仙館叢書

之矢盡發也速敗走遂取萊陽明年從取東昌一帶進克元都又畧平定州遂克太原王保保自保安以大衆來援兵未交而萬騎突至友德率死士五百拒却之因與大將軍謀夜伏兵掩其營王保保乘驕馬以十八騎走復敗賀宗哲於石州擊走四大王友德功最多復從大將軍西入關走張思道於鹿臺降其大帥李思齊關陝悉下賜白金文綺從上典又明年復從大將軍擣定西大破王保保收其士馬輜重移兵伐蜀友德領前鋒攻漢中克之蜀將吳友仁謀復漢中兵大至守臣告急

友德以精騎三千攻斗山寨夜令人持十炬列山上
蜀兵驚散凱旋大封功臣進友德爲潁川侯是歲冬復
議伐蜀湯和廖永忠由瞿塘以舟師趨重慶友德由秦
隴以步騎趨成都既受命帝復密諭友德曰若出其不
意直擣階文門戶旣隳腹心自潰兵貴神速但患不勇
耳友德疾馳至陝揚言出金牛潛使人覘青州果陽空
虛階文雖有兵壘而守備單弱遂引兵趨陳倉選精騎
五千攀緣山谷晝夜兼行大軍繼之直抵階州守將丁
世珍戰敗遁去遂克階州引兵趨文州世珍復集兵據
險以拒友德急攻之世珍又敗僅以數騎遁又拔文州
友德乃引兵渡青州果陽白水江趨綿州至漢江阻水
不得渡乃令軍中造戰艦百餘艘時蜀人雖失階文猶
恃漢水以爲固及聞造舟進取益震恐友德戰艦成將
進攻漢州欲以軍中消息達湯和而山川懸隔適江水
暴漲乃以木牌數十大書克階文日月投漢江順流而
下蜀守者見之爲之解體及友德舟師進逼漢州守將
向大亨戰敗于城下僞相戴壽在瞿塘聞之留鄒興守
瞿塘而自與太尉吳友仁還援漢州旣至友德下令曰

彼遠來勞困聞大亨兵敗衆心洶洶一戰可克也乃親
帥軍迎擊壽兵大敗之遂拔漢州壽與大亨走成都友
德圍成都壽與大亨以象載甲士出戰友德命前鋒以
弓矢火箭衝之象皆被傷却走壽等遂率官屬出降蜀
中大定時邊境咸寧惟雲南恃其險遠殺信使納逃遁
帝以友德爲征南將軍率師討之濱行諭之曰雲南僻
在遐方行師之際當知其山川險易以窺進取朕雖未
親至其地嘗覽輿圖咨衆論得其扼塞取之之計當自
永寧先遣驍將別出一軍向烏撒大軍繼自辰沅以入
晉安分據要害乃進兵曲靖曲靖雲南之襟喉彼必並
力於此以拒我師當察形勢出奇取勝旣下曲靖三將
軍令一人提勁兵趨烏撒應援永寧之師大軍直趨雲
南彼此牽制彼疲于奔命破之必矣雲南旣克分兵趨
大理先聲旣振勢將瓦解其餘部落可遣人招諭不必
皆煩兵也友德恪遵成筭竟平雲南乃詔友德等還京
進封潁國公子孫世襲

斷曰

友德英勇冠絕一時輾轉擇主主皆不知小孤見帝

帝方稱奇倬爲別將出入相隨大戰友諒被創不移
高冠山隘一鼓奪之矢出腦後戰猶前持保保李二
橫戈直趨驍將韓乙槩刺如屍卧槍以待踊躍以馳
旣走思道復降思齊關陝悉下伐蜀何辭列炬山上
驚走其師階文旣克其餘莫支轉戰轉勝愈入愈威
雲南之捷以逸制疲所以得志振旅而歸子孫世襲
誰曰不宜

廣名將傳卷十八

明

三

海山仙館叢書

廣名將傳卷十八終

廣名將傳卷十九

古閩黃道周石齋註斷

姚廣孝

姚廣孝長洲人少祝髮爲僧名道衍字斯道已又不學佛而好讀兵書會遇異人授占術輒爲人決休咎洪武中高皇帝分封十子成祖封燕王道衍乘間請謁曰大王骨相非常英武冠世今皇圖草昧東宮仁柔願厚自愛大王試乞臣府中當奉一白帽與王戴蓋王上加白

廣名將傳卷十九

明

一

海山仙館叢書

其文皇也成祖已稔知道衍亦欲得道衍會高皇后崩帝命王與一名僧誦經念佛修齋成祖遂乘機請道衍去後高皇帝崩建文卽位齊黃用事逼執伊周齊谷削爵爲庶人湘獻王自燒死事且至燕燕王懼甚因憶道衍言而召之人卜道衍遂借卜而說燕王曰主上猜間宗室侵漁齊藩所戮辱囚首隸土伍者蓋五王矣大王先帝所最愛也且又仁明英武得士衆心主上所最忌也夫燕勝國之遺而北方雄鎮也其民習弓馬地饒棗栗若悉雄薊屬郡之材官良家子殼甲可三十萬粟支

十年大王之護衛精兵投石超距者又不下一二萬鼓行定山東略河南此勢若建瓴而下誰能抗禦大王若不南然機已發欲高卧得耶旦暮匹夫耳臣竊謂大王卜之心與臣卜無異也燕王初猶拒之及朝廷責燕益急燕王遂召道衍入便殿密議或歎息泣下道衍曰天之所興誰能廢之燕王因問師期道衍曰未也俟吾助者至又問助者何人曰吾師又數日乃請曰可矣燕王遂謀召張昺謝貴等宴設伏斬之遣張王朱能攻克九門出祭纛見披髮而旌旗蔽天者燕王問道衍曰何神

廣名將傳卷十九 明

二
海山仙館叢書

道衍曰響固言之吾師北方之將元武也燕王因披髮仗劍應之兵初起暴風雨燕王不悅道衍曰飛龍在天從以風雨元吉也燕王師行後道衍及郭資等奉獻陵居守日夜備禦南兵至攻城設伏截其後城上呼噪伏發急開門夾擊大敗南兵去又夜縋死士下城剗南兵或遣數十人遠伏草莽間夜舉火鳴礮驚南兵不得休息輒出精兵奮擊敗之盡焚九門諸柵寨燕王軍中有聞見異事及兵進止輒緘書飛騎問師師盡條答附去並中機宜靖難後立爲左善世復姚姓賜名廣孝立東

宮陞太子少師帝令蓄髮再三終不肯嘗賜兩宮人逾月不近亦不辭帝乃召還永樂十六年來朝北京寓慶壽寺病車駕直臨視卒贈少師榮國公諡恭靖

斷曰

姚師廣孝人中之英雖云祝髮借佛論兵高帝十子燕具龍形一眼覷定故請從行先奉白帽後卜言情既知心動方細奏明激之兵起促之進征不出所算帝業果成雖加少師亦是虛名大都應運自是天生

劉江

廣名將傳卷十九 明

三 海山仙館叢書

劉江宿遷人從靖難兵興適遼東時守將楊文引兵圍永平略薊州遵化諸郡縣帝急遣兵率衆趨永平因謂之曰爾至永平敵必遁歸山海勿追之第聲言還北平必復來侵爾速出擊之必大獲江如言果敗東兵于昌黎斬首數千級建文三年七月平安自真定率兵攻北平營于平村離城五十里擾其耕牧世子督衆固守帝聞北平被圍召江問策江慷慨請行因與帝約曰臣至北平以礮響爲號一次礮響則決圍二次礮響則進城若不聞第三次礮響則臣戰死矣臣若入城中旣聞收

至則守城軍士勇氣自倍則令軍士人帶十礮俟三次礮響之後爲殿者放礮常不絕聲則遠近皆謂大軍至平安必駭散矣江遂進兵與安戰悉如其策乃大敗之永樂十七年江爲左都督鎮守遼東巡視諸島相度地形以全州衛金線島之望海埭地高可望諸島寇所必由實濱海襟喉之地請築城堡立烟塹瞭望一日瞭者曰東南夜舉火有光江計寇將至亟遣馬步官軍赴埭上小堡備之令犒師秣馬略不爲意以都指揮徐剛伏兵于山下百戶姜隆帥壯士潛燒賊船截其歸路乃與

廣名將傳卷十九 明

四 海山仙館叢書

之約曰旂舉礮鳴伏兵奮擊不用命者以軍法從事翌日倭賊二千餘人乘海鰲直逼埭下登岸魚貫而行如入無人之境江披髮舉旂鳴礮伏兵盡起爲兩翼而進賊大敗橫屍草莽餘衆奔櫻桃園堡中官軍環而攻之將士欲入堡剿殺而江不許故開西堡以縱之仍分兩翼夾攻生擒數百斬首千餘級有脫去入鰲者盡爲隆所縛無一人得免師還諸將請曰明公見敵意思安閒惟飽士馬及臨陣披髮而戰追賊入堡不殺而縱走之何也江曰窮寇遠來必饑且勞我以逸待勞以飽待饑

固兵家治力之法耳賊始魚貫而來成長蛇陣形故披
髮作真武勢以鎮服之雖愚士卒之耳目亦可借以壯
氣賊既入堡有死而已我師攻之彼必死鬪我兵寧無
傷乎故縱之出路而後掩擊之卽圍師必缺之意耳此
皆兵法諸君未察也捷聞進封廣寧伯先是倭寇出沒
海上燔民居掠貨財殺擄人口凡沿邊無歲不受其害
及爲江所挫寇患屏息者數十年及卒人思慕之諡忠
武

斷曰

廣名將傳卷十九

明

五

海山仙館叢書

大將劉江從燕靖難師圍北平馳救不憚約礮三聲
圍兵解散進戰勝之果如其算倭犯海城先已瞭探
伏兵待來潛師截斷倭賊二千被誅大半餘逃櫻園
轉逼其竄細論兵機一一合案爲將若斯一時獨冠

王驥

王驥字尙德東鹿人永樂四年成進士爲人剛毅有膽
曉暢戎機嘗奉命山西奏蠲鹽池逋課二十餘萬人皆
德之滿九載進兵部尙書時西兵阿台朶兒只伯數侵
盜甘涼諸邊掠殺吏人總兵任禮蔣貴等勢敵不相下

狐疑莫發於是驥輟部務行邊奉詔一切便宜行事時都指揮安敬爲偏將驥而怯都督蔣貴都御史曹翼追兵至魚海子已將及之而安敬謂前途無水草不可進遂引還驥察知而故秘之既至而大會諸將方就坐忽猝敬下曰兵貴進獲汝奈何逗撓誤大事遂命斬敬復謂貴曰公亦當死今且責狀以報於是諸將士股慄莫敢仰視驥乃請分兵畫地各自鎮守約以賊小至則各自戰守大至則並力拒敵軍勢遂大振尋又詔驥進討阿台朶兒只伯驥諜知敵營狼山等處乃選精騎授蔣

貴使爲前鋒任禮爲將軍以大軍繼之且與貴約曰勉旃不能成功無相見也貴感奮直前搏敵敗之敵渡黃河遁去貴等又追敗之千名城獲金銀璽印各一駝馬兵甲以千計朶兒只伯與阿台以數騎遁尋渴死而任禮兵亦至又共窮追五百餘里至黑泉降其部落數十帳而還捷聞各加爵賞尋詔驥還理部事既而麓川宣慰司思任發叛雲南總兵沐晟數討不利遂至憂死而刑臣何文淵援舜舞干羽格苗事請使撫諭驥因議以天下全盛而示弱于舊屬小夷非策時中貴王振方

柄國喜功名遂紬文淵說而命蔣貴爲平蠻將軍驥總督軍務大發諸鎮兵合十五萬討之驥馳傳至雲南奏上方略請遣冉保等由東路直取孟定而大軍由中路至騰衝與保會俾賊腹背受敵從之驥等抵金齒其別酋陶孟刀門捧以鎖康降遣冉保等率輕兵五千受之因其衆破昔刺寨進攻孟通而驥等以兵二萬水陸攻上江敗其伏兵遂進圍上江寨副總兵劉聚等兵亦至因風焚其排柵遂大破之殺其將刀放曼刀招漢父子及虜刀門瑱斬馘五萬餘級上江平又由夾象石渡下

廣名將傳卷十九

明

七

海山仙館叢書

江直抵木籠山連破其七寨又破其象陣進圍麓川縱火焚其門俘斬及溺者數萬人思任發夜攜其二子走孟養驥以大捷聞會維摩州賊韋郎羅自稱廣新王以叛因詔驥旋師討之驥曰此不足血吾刃也乃遣偏師壓其境曰王尙書大兵至矣賊大潰韋郎羅走安南傳檄捕之安南王懼斬其首來獻師旋上遣大臣迎勞之旣入見慰勞有加後思任發子思機發復反孟養驥又督諸軍討之師抵金沙江賊柵西岸以拒驥造浮梁渡兵攻破之乘勝追至孟養賊斂衆拒險爲寨我師皆攻

破之斬獲無算思機發竟失所在孟養在金沙江西去
麓川千里諸酋皆驚曰自古漢人無渡金沙江者今王
師至此真天威也驥威名雖甚著然卒不能得其渠魁
天順四年卒贈靖遠侯諡忠敬

斷曰

尙書王驥奉詔行邊指揮安敬驢怯斬焉軍勢大振
莫不爭先謀敵犯境蔣貴檄前任禮繼後勗其勉旃
若功不立相見無年衆力感奮一戰赫然黃河敵遁
追至黑泉俘以千計斬獲十全捷聞還部再討麓川

廣名將傳卷十九

明

八

海山仙館叢書

東西乘隙腹背搗堅破其七砦俘溺萬千任發機發
敗逃若烟渠魁雖失天威大宣文臣出討殊足稱賢

于謙

于謙字廷益杭州人也七歲時蘭古春善相見而大奇
之曰此兒異日救時宰相也十六補邑諸生時按察僉
事行學督諸生過峻爭噪而犄之方誼攘間僉事忽墮
泮宮池諸生皆驚走謙獨前掖之起僉事怒乃欲以罪
歸謙謙徐對曰噪公者走不噪公者畱此易曉也今不
罪噪公者猶可而因以罪援公者其謂何僉事慚而止

而謙由此顯名年二十三成永樂十九年進士拜監察御史風骨秀峻吐音鴻鬯每奏對上必爲之傾聽按江西辨誣獄冤死者出數百人後議增補各部右侍郎上手書謙姓名下吏部遂超拜兵部右侍郎時年僅三十三嘗輕騎自河內歷太行而盜有窺者謙厲聲叱之皆大驚散走曰不知爲我公也當入朝議事人謂卽不橐金以往豈無一二土物充交際耶謙笑而舉其兩袖曰吾惟有清風而已時中貴王振勢張甚以謙無私謁嘆之喉人廷劾謙下法司論斬繫三月振悔無謂乃托詞

廣名將傳卷十九

明

九

海山仙館叢書

曰吾嘗見一故御史名若干謙者恣甚欲治今乃非此于謙耶赦之未幾仍復兵部右侍郎正統十四年秋敵也先入寇時王振喜功遂挾上下詔親征謙與尙書鄺埜上言也先醜豎子耳諸邊將士足以制之陛下爲宗廟社稷主奈何不自重奉以與犬羊角乎上不聽埜乃從治兵而畱謙治部事車駕至土木蒙塵報至京師大震時皇太子冲幼不能監國太后乃命郕王攝政王御左順門時中外臣咸恨振而欲食其肉請用反法罪其家奏未竟而振黨錦衣指揮馬順遂妄傳王旨欲叱衆

退給事中王竑起而直前擒順曰此翼虎者也今日猶敢爾衆臣爭捶之立死又捶二閹之嘗私振者死時衛卒聲洶洶王懼欲退諸大臣皆披靡有趨匿者謙獨直前掖王具啟王下令捶順與二閹死者義激無罪復請皇太后降旨族振並籍馬順家衆始退郕王既卽位以謙爲賢進謙兵部尙書內外倚之爲安謙因慷慨泣奏曰敵得志挾我大駕勢必長驅而南今軍實武庫俱盡矣司馬宜急分道募兵及畱漕兵自益司空宜蒐乘繕械九門要地宜令都督分守凡兵皆出營郭外毋令避

廣名將傳卷十九

明

十

海山仙館叢書

而示弱郭外之民皆徙入內安插毋令失所而囂通州倉諒不能守委以與敵則非算宜令官軍皆豫給一歲祿俸聽其自運敵所急者草諸厰所積宜聽軍稱力取之不盡則焚之毋以飽敵馬石亨楊洪材勇可用請赦之與安遠侯柳溥爲大帥而身總其機宜進止不效則治臣之罪以謝天下上皆嘉納之旣而敵信益急侍講徐理好言天象力言紫薇中宮俱有變必反故都而後吉而二三大臣復依違其間搢紳士人又多遣其私歸謙乃慟哭廷諍曰京師天下之本宗廟社稷山陵在此

百官萬姓帑藏庾廩萃此此而不守去欲安之今日足
一動明日大事去矣宋之南渡非前鑒乎且敵乘勝而
驕實不足畏上聞之稱善遂一聽其處分十月也先以
送太上皇還京爲名入寇紫荆直窺京師石亨欲閉九
門自守謙曰是示弱也乃躬擐甲胄以太義泣諭六軍
由是人人感憤及也先逼城謙與石亨設伏敗之又謀
知上皇駕遠夜復以火礮擊其營死者甚衆也先大沮
衆請進擊謙曰勝不足以削恥萬一不捷所損實多況
上皇在其中不可不詳愼請大書聖旨榜文潛遺敵營
諭回達矣漢有能擒斬也先來獻者賞萬金封國公以
疑其心敵知有備又城外無所掠遂引去論功加少保
總督軍務大同參將乞與之和事下兵部謙力言其不
可曰中國與敵有不共戴天之仇和則背君父而忘大
義於理不可和又敵貪而多詐和議行而有無厭之求
從則坐斃違之則生變於勢不可和苟以強敵難制姑
和以緩其兵則宋澶淵盟後國勢陵夷無救于敗則和
議不足恃明矣今惟選將練兵養威蓄銳賊侵則相機
而剿殺賊遁亦不貪利而窮追可也若遣使求和則示

敵以弱而啟輕侮之心萬萬不可上嘉納之謙又言也
先屯聚敵衆迫我邊疆若不豫爲設法選練則軍不識
將意將不識軍情必不能爲用請選馬步軍一十五萬
分爲十營俱聽臣往來提督如有聲息互相策應征剿
臨敵必能成功詔曰可團營之設自此始大監喜寧故
俘敵也下蠶室入中貴土木敗因降也先遂以中國虛
實告之而凡敵之入寇皆喜爲鄉導謙因言不早除喜
寧敵知我險易虛實定反覆不可禦因密以計授楊俊
擒喜寧誅之此後也先方悔禍奉上皇還京師初永樂

廣名將傳卷十九

明

十三

海山仙館叢書

間韃敵來降者多安置于河間東昌等處生養蕃息驕
悍不馴當也先入寇之際皆乘機騷動幾至不可收拾
會發兵征湖廣貴州苗寇謙奏遣其有名號者厚與賞
犒隨軍進征及事平遂請畱于彼數十年積惡一旦潛
消識者稱快貴州苗寇久不平侍郎何文淵欲請罷二
司專設都司而以大將鎮之謙曰不設二司是夷之也
夷之何以通滇楚道且無故而棄祖宗所設地不祥事
遂寢當是時浙閩則有鄧茂七葉宗畱廣則有黃蕭養
又有獐猺苗獠處處蜂起前後命將將兵皆出謙意號

令明審動合機宜故天下咸服太上既歸上奉之南城
又欲易皇太子謙以非所職不敢爭七年上不豫石亨
與中貴人曹吉祥等奪南城門迎太上皇復辟自以爲
功因嗾言官劾謙盜金符迎立襄王爲帝坐以謀反極
刑鍛鍊然無顯跡可據謙笑曰亨等意欲死我辨之何
益既奏上帝猶豫曰于謙實有功若何時徐程改名有
貞而與亨比因前曰不戮謙此舉爲無名謙遂論棄市
籍其家自上賜外無長物謙死之日陰霾翳天行路嗟
歎吉祥麾下有達官朵耳者以一觴酹地而慟吉祥恚

廣名將傳卷十九 明

三

海山仙館叢書

撲之明日復醢慟如故未幾西北邊報甚急上憂之恭
順侯吳瑾侍進曰于謙若在不令敵若此上爲之默然
既而徐有貞下獄流金齒亨下獄瘐死曹吉祥族成化
二年謙子于冕上疏白冤上憐而復其官並還沒產賜
祭有云當國家之多難保社稷以無虞惟公道而自持
爲權奸之所害在先帝已知其枉而朕心實憐其忠天
下誦而稱之宏治特贈太傅諡肅愍萬厯改忠肅

斷曰

于謙正臣大有權術出按江西辨明冤獄進謁權門

清風拂拂土木蒙塵京師兀兀中外慌張羣臣鶻突
請立郕王江山手握選將畱兵九門保室豫支飽兵
焚芻馬黜城外立營不爲少怵或請南遷謙力衆拂
幸帝祭忠計聽謙出借送上皇來如無物遇伏敗歸
方驚有律鎮定大功實實難沒但惜南城於禮稍失
君死臣誅事亦非屈

郭登

郭登字元登英之諸孫也永樂中充勲衛正統七年從
王驥征麓川有功九年從沐斌征騰衝有功陞都指揮

廣名將傳卷十九

明

古

海山仙館叢書

僉事十四年敵人塞急進都督僉事守大同會上親征
全軍覆沒倉卒議班師登告學士曹鼐曰駕宜從紫荆
關入乃忽東折向居庸關纔四十里敵突至上遂北狩
是時大同堡塢蕭條城門晝閉人心洶洶登雖處危疑
而氣益壯慷慨自奮修城繕兵拊循士卒衆皆感奮八
月敵擁上皇至城下索金帛詐言歸駕登閉門不納上
皇曰朕與登有姻何外朕若此登遣人奏曰臣奉朝廷
命守城不敢擅啟閉竟不出霍瑄等出見獻上皇金幣
及約賄往敵笑不應竟擁駕去十月敵以和爲名入犯

京師登欲帥所部兵並糾集忠義從雁門入援先以蠟書馳奏請悉起各處官軍民壯入護闕庭京兵擊于內臣兵擊于外使彼腹背受敵首尾不救奏至敵已退優詔褒答時論壯之十二月敵欲復犯京師登以京兵新選不可輕發又上疏曰今日之計可以養銳不可浪戰可以鬪智不可鬪勇其涑水易州真定保定一帶皆堅壁清野京兵分據犄角安營以逸待勞以主待客勿求僥倖務在萬全此謂不戰而屈人之兵善之善者也景泰元年謀報敵入朔州敵自屢勝以來出入自由竟莫

廣名將傳卷十九 明

五

海山仙館叢書

與拒登不勝忿晝夜激勵將士定爲賞期必殺敵而後已及是得報遂率兵躡之行七十里至水頭日暮休兵夜二鼓報云二十里東西沙窩敵營十二皆自朔州搶掠而回者登召將士問計皆言彼衆我寡莫若全軍而返登曰我兵去城已百里若一退避人馬疲倦彼以鐵騎來追雖欲自全得乎因卽按劍曰敢言退者斬徑薄敵營天漸明敵以數百騎迎戰登奮勇先進諸軍繼之呼聲震山谷遂大破之追奔四十餘里斬敵首二百餘級奪回人馬器械以萬計時登僅八百騎破敵數千爲

一時戰功第一賜勅褒美進封定襄伯登爲將智勇善撫士卒紀律嚴明料敵制勝動合機宜初至大同士可戰者不及數百馬止百餘匹不數年馬至萬五千匹精兵數萬人與彼相拒大小數十戰未嘗挫衄嘗以已意設爲攬地龍飛天網等法鑿爲深塹覆以土木人馬通行如履實地及彼入圍中令人發其機自相擊撞頃刻十餘里俱陷又用礮石擊敵一發五百餘步人馬死者數十敵相傳以爲神上皇天順元年謫戍甘州初上皇陷敵也先以復駕爲名逕逼京師于謙使人謂之曰賴

廣名將傳卷十九

明

六

海山仙館叢書

宗廟社稷之靈中國已有君矣及駕至大同登言亦如之蓋權辭以沮狡寇之謀也上皇啣之故有是謫未幾召還充國營總兵八年卒贈侯諡忠武

斷曰

郭登變後死守大同上皇擁至借道入攻守城爲重安敢妄通敵笑而去無以表忠晝夜激勵必刃敵曾忽報敵過緊躡其踪彼衆我寡或請避鋒登曰若避城遠誰容敵騎後蹙死不英雄何不血戰以成大功因而奮勇直撞橫衝斬獲無算敵寨一空捷奏天子

褒美定封上皇復位謫去匆匆爲人臣子難保始終

韓雍

韓雍字永熙吳人也弱冠舉進士選授監察御史出巡江西衆猶謂雍年少未經事雍抵鎮振刷精彩經措宏大後先皆弗如也成化二年廣西徭酋侯大狗倡亂蔓延廣東高雷廉之境所至殘毀守臣不能制兵部尙書王竑薦雍智勇過人宜任討之遂擢爲僉都御史同將軍趙輔往討之兵至南京衆議欲分江西軍及達官從游擊由庾嶺入廣東大軍則從湖廣入廣西以賊在廣

廣名將傳卷十九

明

七

海山仙館叢書

東宜逐之在廣西宜困之也雍曰不然兵有聚而爲正亦有分而爲奇今廣西已無完郡而大藤峽爲賊巢穴不是之圖而趨其末則賊愈奔突汗漫郡縣愈殘毀是救火而噓之也未見其能濟苟全師至彼南可以攻大藤峽援高雷廉東可以應南韶西可以取柳慶北可以斷陽峒諸路譬如常山之蛇動無不應腹心旣潰諸處之賊假息游魂耳何須逐乎且軍志曰兵貴神速不貴巧久又何泥于困乎將軍趙輔知雍才軍士一聽之雍于是督大兵兼程進擊直抵大藤峽道有儒生里老數

百人跪持香曰我輩苦賊久矣今日幸遇天兵得生爲
良民願先三軍降雍大怒顧左右叱曰此皆賊耳縛斬
之左右初猶疑旣縛而袂中利刃出乃悉斷頭散手足
剝腸胃分挂箐棘中賊見而大驚沮曰韓公天威也遂
大破之前後斬獲四萬有奇進擣大藤峽覆其巢穴其
中盤亘數百里山澗險阻有崖名九層樓尤爲斗絕官
軍直抵其上磨崖紀歲月而還復斬峽藤斷之易名斷
藤峽以志武功自是蠻夷畏懼兩廣寔安捷聞上大嘉
賞雍功卽軍中拜左副都御史雍威嚴擬王公盡法繩
下不貸以故謗議遂起內臣黃沁忌公縛束不得肆喉
人上書誣公上遣使卽訊雍引疾乞歸卒年五十三諡
襄毅

斷曰

韓公永熙經措宏大命征大藤腹心直破絕不分兵
小爲之挫趙輔主軍甘心爲佐火速進兵如風雨過
里老儒生道迎而賀雍曰奸人縛誅毋倚搜證藏鋒
方知不錯斷首屠腸懸林以播賊見震驚敗走無那
直覆其巢紀功崖磨自此夷蠻強變爲懦遠近黎民

貼席而臥功大忌多讒人附和引疾乞歸苦辛誰課

馬文昇

馬文昇字負圖河南鈞州人登景泰二年進士歷官山西湖廣所至發奸摘伏皆有神君之稱成化四年固原土夷滿四據石城以叛擢文昇巡撫陝西與總督項忠帥兵討之進至固原賊據石城之險先是官軍屢戰不利忠督兵敗之賊堅壁不出文昇言于項忠曰聞賊城中無水芻粟亦漸乏若絕其樵汲則釜魚當自斃矣忠以爲然令官軍堵室其水源又掩捕樵汲者詰之乃知

廣名將傳卷十九 明

五

海山仙館叢書

城中正艱于水卒用坐困之策擒四斬之八年七月比敵寇臨洮鞏昌文昇遣兵敗之追至黑水口斬首數千級擒其平章迭列孫命兼總制三邊九月敵復寇韋州深入至好水川文昇復總兵破之于湯羊嶺敵敗走盡棄輜重俘斬二百餘級因改其嶺爲得勝坡勒石以紀十四年建州女直復叛巡撫陳鉞欲誘殺進貢夷人以掩已過由是東夷譁懼爲亂上命文昇撫剿時汪直恃寵倖功陰主鉞議欲邀文昇偕行文昇弗聽疾馳至鎮撫黑鎖忒等二百餘人比直至敵已散矣無所解深啣

之鉞行事乖方每被文昇更置約束不得逞亦恨之及直巡邊鉞懼見罪戎服遠迂除道飾厨供帳解備賄訥僣從而文昇獨與直抗禮奴視其左右左右多舉鉞而詆文昇鉞復乘間毀之直還奏文昇妄啟邊釁女直建州諸敵皆以文昇禁不與農器故屢寇塞文昇遂下獄謫戍然所禁乃鐵器非農器也士論惜之已而直敗鉞亦敗文昇得雪復官左副都御史巡撫遼東士卒聞文昇復至皆鼓掌喧舞蓋文昇至是凡三度遼矣多有惠政故東人至今思之旋入爲兵部尙書會貴州都勻苗

叛守臣請合三鎮兵討之文昇念天下方困于兵以爲不可惟遣官勘處卒無他也未幾敵小王子以數萬騎駐大同邊外勢洶洶屬文昇有小疾上使中貴人挾醫視文昇疾賜上尊餼糲因問計文昇謂此敵方敗于他部勢已絀無能爲也請密爲之備而揚聲逼之敵果徙去安南侵奪占城五州地占城請命官往問其罪文昇上言春秋王者不治夷狄今安南負固多年若遣官往至其國以掉口舌小必文過飾非大或執迷玩命若置而不問損威已多若問罪興師貽害尤大非計也會二

國各入貢仍請面折諸廷安南詞服因諭以恩威禍福
厚賜之歸令還占城侵地竟不煩兵而解廣西二守岑
欽與姪溥相仇殺巡撫欲討之文昇不許第令騰書戒
飭已皆悔悟納款請死宏治七年議絕土魯番而復哈
密先是哈密在肅州西北千五百里本韃靼回回雜處
之國也永樂初設其地爲哈密衛封元肅王之裔脫脫
爲忠順王賜金印城哈密居之令爲西域之襟喉以迨
諸番之朝貢位雖高而兵最弱忠順王死無子王母理
國事憲宗朝土魯番鎖檀阿力王恃強擄王母及金印

廣名將傳卷十九 明

三 海山仙館叢書

而去國人驚散已而王母死鎖檀阿力亦死子阿黑麻
嗣位甘肅守臣請乘間以王母甥早愼襲封爲王遣兵
送入哈密阿黑麻謂早愼非脫脫之貴族佯與結親而
誘執之至孝宗朝而阿黑麻以金印城池來歸文昇謂
哈密三夷種共居一城早愼非貴族故衆不服必得元
之遺裔方能興復哈密因訪得王姪陝巴襲封忠順王
主國事未幾阿黑麻復擄陝巴及金印去報至朝廷遣
兵部侍郎張海德經畧之遂修嘉峪關捕哈密黜詐回
回通黑里麻教令反覆爲奸者二十餘人發戍廣西文

昇曰此敵旣遣使人貢復擄陝巴金印其心輕中國不大創之不戢請閉嘉峪關絕諸番貢令西域歸怨阿黑麻以攜其黨上從之阿黑麻緣此益驕橫詐稱以萬人入寇甘肅報至朝議頗駭文昇曰土魯番至哈密十數程哈密至苦谿又數程路之水草聞夷使人貢多帶水行今若遠來肅州有備彼豈得全歸哉料不能至特以虛聲恐我耳已而果不至八年阿黑麻復令酋目牙木蘭率番夷三百騎入據哈密文昇亦奏請執阿黑麻之貢使四十餘人流聞廣而薦都御史許進率副將彭清

廣名將傳卷十九

明

三

海山仙館叢書

選番漢兵倍道而至夜登城破之斬級六十降自保者八百人牙木蘭以千里馬走報阿黑麻阿黑麻方與赤斤蒙古衛相仇殺不能大發兵僅使別將將輕騎五百圖復哈密復爲赤斤衛兵所擄殺乃遣使上書謝罪請歸陝巴及金印於是文昇亦奏還其貢使酬以少金帛而哈密復後轉吏部文功不述至正德元年致仕卒贈太傅諡端肅文昇立朝五十餘年以身殉國不避艱險凡有大議衆莫能決者文昇至一言而決至于值事變臨利害屹然如山不可搖奪

斷曰

文昇馬撫巡按山西固原土賊據險吼嘶官軍屢敗
項忠督提馬諭無戰城乏水隄斷其樵汲釜魚自攜
項忠從信擒四燃臍敵寇臨輦遣將削泥再入好水
戰獲其輜女直復叛陳鉞敗栖欲殺貢敵以掩己非
貢敵譁懼亂震鼓輦文昇往諭解散不疑內臣汪直
借此出師及至邊境無敵排擠懷恨馬撫下獄奏題
至於直敗位方復躋不戰而撫中安外齊卽至大創
必勢所宜所以立朝高風莫梯

王信

廣名將傳十九 明

三 海山仙館叢書

王信字君實南鄭人成化初以指揮守荆襄時石和尚
劉千斤反信進據房陸民兵不滿千人賊四千餘衆突
至圍之主帥逗遛不援信乃多張旗幟舉火晝夜不息
歷四旬餘間以死士出城五六里舉火鳴礮賊以爲援
兵至驚走有功陞都指揮同知已而移鎮湖廣條陳八
事曰繕城隍廣儲蓄省徭役立賞罰選能官禁窩戶繕
將才慎守備又條上四事曰慎專任以利民情定倉庫
以備兵荒修兵衛以圖無患禁刑罰以省財用未幾信

又上言湘廣蠻夷雖曰腹心之蠹無能爲也但我軍奸黠之徒利其竊發可以邀功今但選精銳常加隄防勿蹈前非其患自息荆襄流連本爲逃避徭役今長老子孫已成家業濫加誅殺非惟死及無辜恐傷和氣南畝之農無所蓄積斂獲未竟餘糧已空機杼纔停布縷何在求免饑寒不可得矣乞選良守令大加存恤濫陞官員無慮千百無一矢之勞冒崇階之賞乞查勘削奪三司方面所以折衝禦侮承宣激揚者也當公以格物廉以律已端本澄源則在朝廷而已憲宗下其章飭勵衆職時永順保靖二夷世相仇殺信諭以威福遂兩解不爲亂靖州及武岡蠻久不靖守臣議剿之信巡邊面諭之竟不煩兵而下召諸苗犒以牛酒且詰其順逆之故皆稽首曰累歲苦揮使徵索故作亂今將軍待我如此願爲屬役何敢反耶因爲信舉肩輿以表敬信歷鎮大邦不營私產平居默坐展玩經史經三十年笥無華衣廐無肥馬鈴閣之下寂無人聲子繼善從善皆舉進士有名

王信指揮荆襄協守和尚千斤雙攻趲趲主帥逗遛
兵不湊手晝夜戒嚴圍之既久突開城門火揚礮吼
賊疑援來驚張奔走乘勝追亡功堪不朽移鎮上言
參無酌有大合兵機一言不苟上下其章申飭儕偶
蠻夷解仇爲之和剖屢征未降面諭稽首竟不煩兵
但犒牛酒小用大才功名山斗

張輔

張輔玉之子以靖難功封信安伯又以父功進新城侯
永樂四年副朱能討交趾由廣西思明府憑祥州入龍

廣名將傳卷十九

明

三

海山仙館叢書

州能疾留龍州輔率衆度坡壘關入安南境進至比江
府新福縣駐營時賊恃東西都及宣江姚江沱江富良
江以爲固緣江北岸樹柵於多邦隘築土城城柵相連
亘九百餘里盡發江北諸郡兵守之又於富良江南岸
列置水椿盡取國中船艦列于椿內諸江口俱下樁木
以防攻擊賊之東都守備亦嚴時列象陣于城柵內路
守隘以老我師適西平侯沐晟以雲南兵與輔大軍合
輔遂自三帶州招市江造舟而進晟軍至洮江北岸與
多邦城對壘而輔率大軍營於城北之沙灘與晟合勢

賊新築土城高峻城下設重濠濠內密置竹刺濠外坎地
以陷人馬輔下令曰賊所恃者此城立功在此一舉期
夜襲城以舉火鳴角爲號是夜四鼓都督黃中啣枚昇
攻具越重濠薄城下以雲梯附城牙將蔡福先登諸將
士繼之火炬齊明銅角競響賊倉皇驚散遂入城賊復
巷戰列象爲陣輔命畫獅蒙馬神銃翼之象見皆股慄
又爲銃矢所傷皆退奔官軍追斬無數西都聞之亦焚
宮室倉庫逃入海輔追至富良江賊欲立柵相拒輔乘
柵未備躬率將士力戰復大破之分道窮追舟師追至

廣名將傳卷十九

明

三

海山仙館叢書

海門涇本淺時久晴水涸賊棄舟遁俄而大雨水漲數
尺我舟畢渡衆喜曰天助我滅賊也益追之遂生擒黎
季犛及其子澄滄等交南悉平因設都布按三司以撫
輯兵民捷聞進封英國公未幾交賊簡定反輔討之獲
簡定還京八年交賊陳季擴又反輔又出討之賊走追
至愛子江登岸賊設象伏以俟官軍輔偵知之戒先驅
曰羣象來衝一矢落象奴再矢披其象鼻象奔還自相
蹂踐大軍乘之賊大敗遂擒季擴餘黨悉降交趾復平
宣德元年漢王高煦反遣人密約輔爲內應輔卽縛其

人白於宣宗擒之二年交賊黎利猖獗遣人進前安南國王三世孫暲表乞立爲陳氏後上以示輔輔曰不可從征將士勞苦數年乃始得之此表出黎利之譎無疑當益兵誅之上不從遂復交趾正統十四年從駕親征王師敗績輔死于土木追封定興王諡忠烈

斷曰

張輔封侯命討交趾交賊隄防亘九百里旣下椿桿又刺濠底輔但令攻一切不理雲梯附城火炬齊起乘賊驚慌遂入城裏列象拒人畫獅驚靡銳矢再加

半逃半死生擒季輦捷聞賜璽再反再平功已足紀請立陳孫聖心稱美遂令大功不全終始土木從亡臣節盡矣

廣名將傳卷十九

明

三

海山仙館叢書

廣名將傳卷十九終

廣名將傳卷二十

古閩黃道周石齋註斷

羅通

羅通字學古吉水人也年二十四舉進士授監察御史會交趾平夷獠新附中朝士憚往上詔御史予三級知交趾諸州通得清化既至黎利叛來攻清化通屢擊却之而成山侯王通擅與利媾棄交趾拔吏士歸檄至通怒髮上指謂都指揮曰王通不奉上命喪地辱國此城

廣名將傳卷二十

明

一
海山仙館叢書

羅生死所耳都指揮曰如教於是獨不與黎利清化利大發兵八萬晝夜來攻圍通死戰大敗之踰年詔使至知成山侯語乃全吏士歸帝怒收成山侯下獄論死贖爲庶人其餘非罷卽謫而獨引見通改戶部員外郎睿皇帝北陷日詔舉將略有以通應者遂擢爲副都命守居庸是歲十月也先脫脫不花擁三萬騎逼居庸甚急通飭將士冒矢石固守不下而宣府參將楊俊者以精騎入衛京師道關欲入通仗劍厲聲曰若欲保京師耶保京師保居庸足矣下令有一人一馬南渡者斬以徇

乃止會天大寒令老弱汲水灌城冰堅滑不可破七日
敵退趨紫荆通選兵追敗之逐出長安嶺中外始定捷
聞加太子少保賜璽書慰獎通數上書論兵事與于謙
不合乞病歸卒

斷曰

羅通豪傑守禦屹然清化一怒生死不遷居庸仗劍
誰敢言旋灌城汲水敵退城全不獨忠勇才實大焉
捷聞帝喜官保加銜始知節烈臨事愈堅

項忠

廣名將傳卷二十

明

二

海山仙館叢書

項忠字盡臣嘉興人也正統七年進士成化四年固原
土達滿四叛據石城遠近戒嚴勅忠往討時伏羌伯毛
忠戰死我兵遽退忠卽戰斬指揮以徇陣始定聞賊城
中乏水草因移兵據賊水草以困之與賊相持百日賊
急忠乃隨二卒單騎抵賊寨曉以禍福諸脅從賊因相
率來降賊愛將楊虎狸忽被擒忠叱令斫頭來虎狸伏
地乞宥死自效忠卽假以詞色許令立功解金鈎帶賜
虎狸遣去故滿四竟爲虎狸所誘擒凡斬首七千六百
俘獲無算六年大旱荆襄流民咸遁入山李鬍子劉千

斤之黨固倡爲亂復勅忠總督討之忠因遣人持榜諭降負險不服縱兵擒剿不赦凡遣還鄉者四十餘萬編戍者萬餘俘斬二千年又討平野王剛小王洪召還院荆襄以忠處置得宜三十餘年賊不復起而議者猶指忠妄殺致干天和交章論奏忠疏辨乞閒上俱不聽

斷曰

爲將用兵要有機巧滿賊石城詔忠往討忠不戰爭但據水草困久賊窮禍福親曉降待以恩擒許自保所以虎狸誘滿以徼賊亂荆襄患復秉旄先以申令

廣名將傳卷二十

明

三

海山仙館叢書

不遽兵擾意在招降負險方剿由此全多誅戮甚少三十餘年地方靜好議者猶言妄殺如草深怪廷臣如此顛倒

陶魯

陶魯字自強鬱林人也父成爲按察副使從擊賊兵敗死之上旌死事者贈官錄一子入冑監魯補焉二十授廣東新會丞魯機明內蘊而神觀不足或從令尉列見上官獨昏睡雖督撫不恤也大藤峽諸賊亂兩廣都御史韓雍總帥討之檄魯隸麾下雍威嚴擬王者二司長

吏見皆長跪白事惴惴若不自勝一日雍顧峒賊最強
險難下者方設策魯時直膳侍左右請食雍謾曰我不
時食丞揣我何意魯曰無非某賊耶雍詫曰然丞既知
之能往否魯曰匪直能往攻之易易耳雍怒曰賊銳甚
又隘阻自衛非大兵不可入部下文武數千百人熟視
無可當吾寄者吾方欲身往安得易且使若食粟能之
耳叢爾邑不能理乃言擊賊若妄當笞魯不拜謝復抗
言曰夫賊難攻者非賊難也我難其攻賊者也謂魯能
食粟不解擊賊者明公未悉魯也蔣琬龐統廢邑事後

廣名將傳卷二十

明

四

海山仙館叢書

乃爲蜀名臣公幸無棄魯使得畢技當悉縛諸醜以獻
雍異之改容曰若所將幾何而辦魯曰三百人足矣雍
曰何少也魯曰猶以爲多兵貴精請任選擇雍曰任爲
之魯乃標式約曰有能身舉百鈞矢射二百步者來三
軍十五萬人其比于式者得二百五十人曰未也請復
下令募數日足魯乃爲別將日操練陣法椎牛酒犒
甘苦共之士爭願爲死卒以先登遂大破賊斬首無算
賊穴所得士女金帛悉以分于三百人已無與者衆益
奮雍大稱賞言于朝累功進同知肇慶府事至左右布

政司錄其後爲錦衣千戶魯前後任廣東所殺及降者二萬七千餘賊聞陶家軍駭慄避遁不及遇卽叩首乞爲良民得無死幸甚然僅三百人耳服其心屢用不躓語有之一夫決萬夫避况三百人乎

斷曰

陶魯內才外形憤憤雍討大藤正憂無對見魯侍前因而戲謂食粟汝知討賊應愧魯曰不然人有癡慧食粟不知討賊頗會蔣龐之流是其前輩雍驚其言授以軍隊三百選鋒可進可退破賊須臾決不反旆

廣名將傳卷二十

明

五

海山仙館叢書

陶家軍名一時稱最方信用兵以精爲貴

王越

王越字世昌大名之濬人也年二十六舉進士後以總督視師延綏以輕騎襲破敵于崖窩川俘四十餘人鹵首至百又破之黃草梁俘五人鹵首百二十人進右都御史前是文臣視師多從大軍後出號令行賞罰而已至越始多選驍勇跳盪武騎爲腹心將而與敵搏始有戰矣或探敵累重而劫之或翦其零騎用是得數成功名旣而謀知敵滿都魯孛羅帖加思蘭三虜自河套渡

分寇西路而其妻子營于紅鹽池乃率總兵許寧等以精騎五千襲之兩晝夜行三百三十里至其地分兵千餘爲十伏以相救而身與寧等分兩哨薄其營遂破之擒斬甚多獲輜不可勝計焚其廬帳而還時滿都魯等行剽至韋州頗有所獲而遇諸鎮兵邀敗之斬首敵一百四十九奪其鹵男婦二千馬騾牛羊十三萬敵旣失利歸而廬帳妻子畜產又皆蕩盡乃相顧慟哭遠徙不敢復居河套故地捷聞再賜璽書褒諭俄召還京旣而敵復西犯邊時上所寵信中貴人汪直年少好言兵越

廣名將傳卷二十

明

六

海山仙館叢書

亦與之好因詔保國公朱永爲平敵將軍由南路會榆林越爲總督率師西討直自監其軍旣至大同諜知敵帳在威寧河因遣勁騎二萬餘分道乘風雨薄之敵狼狽出戰遂破敵斬首四百三十七級俘獲無算捷聞越進封威寧伯越居常喜奢華自奉若諸侯王而其御軍恤下財往來若流水籠罩豪傑不知所從人皆願爲之死軍行過陝西秦王賜宴秦伎越語王下官爲王吠犬久矣寧有以相酬者因盡乞其伎女歸一日大雪方坐地鑪使諸伎抱琵琶捧觴侍忽一千戶訶敵還卽召入

與談敵事甚晰大喜曰寒矣手金卮飲之復談則益喜命絃琵琶而侑酒卽並金卮予之已又談則又喜指其伎中最姝麗者曰欲之乎以乞汝自是千戶所至皆效死力一日夜襲敵帳將至風暴起塵翳目衆惑欲歸一老卒前曰此天贊我也去而風使敵不覺歸而卒遇敵人掠者還而我據上游皆是風也越不覺下馬拜功成推卒功以爲千戶以家近京得通于中貴人李廣後廣敗自殺言者皆首攻越上雖雅重越不爲報而越坐憂悴曰劇遂卒

斷曰

王越文臣偏長于武視師延綏以將自許斬獲占多

論功誰阻謀賊威寧乘風襲取功成捷聞威寧封補

師過秦王賜宴歌舞吠犬自陳乞其伎女雪夜擁鑪

麗姬環處將詞敵還命之人語語敵詳明飲以金縷

再語得情金卮賜與語終入神麗姝乞汝所以士心

死于爲主

王瓊

王瓊字德華山西晉州人也舉進士武宗朝召拜戶部

尙書久之改兵部瓊爲人多計算穎敏默識凡天下兵馬數多寡強弱及塞隄夷險偏裨才否一覽悉記無遺武宗末饑民乘間起爲盜最大者山東劉六河南趙鐃蜀中藍鄙江西桃源華林瑪瑙多者至二十餘萬攻城剽府庫日益盛封事告變旁午瓊手錄指悉計合機宜敵嘗入寇山西一得利踰歲乃復獵境上陽若東者瓊曰是必趨舊利奏集諸鎮兵據山西要害賊果入大敗之進少保贛州盜大起王守仁時巡撫其地請便宜從事瓊才之咸報可守仁果以次平賊寧王反報至朝中

廣名將傳卷二十

明

人

海山仙館叢書

外惴惴無人色而瓊益治兵自如衆問之瓊曰吾久用王守仁在上游何謂耶寧王之反度此時已執之矣亡何果報守仁執王時都督江彬得幸瓊陰與厚結所言無不當瓊得以成功者此也嘉靖改元言官論瓊奸狀下獄論死赦戍遼左瓊上疏自辯釋爲民後敵復入陝楊一清還朝難其代詔復瓊尙書總督諸軍事瓊至修一清之政加振刷焉因逐敵去旣而築牆阻敵招商實邊功配楊一清進太子太保後改吏部卒

斷曰

王瓊大才高坐堂上盜賊紛攻洵洵蕩蕩調將遣兵無一不當敵寇山西驕矜無狀奏集鎮兵伏擊敗喪報反寧王中外驚悵瓊曰無傷久已有將上游下攻此時已創亡何捷聞方知非妄但惜正人往往遭謗削職復官有如風浪

馬昊

馬昊關中人也長身驍勇善騎射舉進士爲御史以罪謫眞定推官至則敎吏士習武多布置鈎指民家有流劫奸盜亡命悉擒之再因前罪謫判開州吏士伏闕上

廣名將傳卷二十 明

九

海山仙館叢書

言馬昊於眞定稱保鄣請勿謫詔許之亡何蜀盜藍鄙叛合四省兵討之未效吏部言馬昊才因陞蜀按察僉事佐治兵昊至閱所部兵笑曰將不知兵若勝何因擇驍勇才力之士千人分四隊隊各立長會賊來逼城昊夜出百騎舉礮擊賊賊營亂自相蹈籍乃悉兵從後乘之斬首四千級軍中皆喜以爲兵起未有者昊曰此尙未見大敵胡足喜宜及勝用之遂前逆賊敵方陣左而伏兵於右爲應昊以正兵當左而身與兵百騎直擣伏伏驚潰趨左左陣亦潰兵合擊火其柵大破之斬騎將

方四捕首敵降萬人遷副使時賊勢尙張當事議招降賊雖請降而乞住劄臨清市空其民吳曰臨清市蜀襟喉上達重敘下通湖湘其地饒富沃衍胡可委敵以自困獨益治兵募召豪傑賊因不敢東未幾賊復反集衆至二十萬前後官兵俱敗績賊遂進圍中江因謀向成都吳以五千騎馳赴中江擊之賊敗走窮追之殺賊帥廖麻子遂進僉都御史巡撫蜀廖麻子死餘黨尙數萬竄于東鄉山復推喻老人爲帥吳請于總督彭澤曰山險不便騎射願發步兵三萬據出入要道賊自餓死也

澤如吳言賊窘果縛喻老人請降而他賊在遂寧渠縣者相繼平進副都逾歲有亦不刺自西海犯松潘蜀大震吳招土番爲間取道夜襲之賊遁獲輜重及衣械甚夥事聞加祿俸一級高珙筠焚人普法惡倡諸夷部立寨僭號攻劫吳率兵搗破之降者萬計獨青山寨不下吳行周視寨曰此固高絕水道可下也乃遣兵據泉口而攝南方圍待之兩日賊渴峴南圍薄夜走兵從後追捕首敵及萬人執普法惡誅之進都御史蔭一子錦衣百戶然吳好功名又欲討松潘夷不勝逮下獄罷免

斷曰

馬吳用兵妙于有制所以賊來斬殺如意小勝不奇大敵方異賊左立營伏右以濟吳偏伏趨伏未及備敗潰左奔並左失勢左右俱傷敗走無地當事招降猶欲據市吳不許之中江復吹麻子等誅老人旋棄法惡再萌諸夷重二吳直擣之降者萬計最險青山據泉而斃始知將能戰無不利

王守仁

王守仁字伯安餘姚人也宏治十二年舉進士正統元

廣名將傳卷二十

明

士

海山仙館叢書

年劉瑾亂政守仁抗疏劾之受杖被謫貴州龍場驛丞瑾敗方漸起歷陞至巡撫南贛汀漳等處守仁至置二匣行臺前榜曰求通民情願聞已過當是時寧王宸濠蓄逆謀江西上流山谿中劇盜出肆掠劫焚官府篡獄囚廣東湖廣江西諸撫臣皆互相觀望久之積至數十萬宸濠又輒與諸賊通曲護于賊守仁逆知有變仍請提督軍務兵部尙書王瓊素奇守仁因請上卽與守仁兵符改提督是年茶寮賊大起江廣湖郴騷然上命三省會征守仁首誅通賊監生吳讓然後督江西兵自南

康人破橫水左溪巢賊敗奔復連戰奔桶岡又攻桶岡
大戰西山界賊大潰盡殪之凡破巢八十四擒斬三千
餘俘三千六百有奇釋其脅從千餘人歸流亡使復業
度地居民開山通道夷其險阻洄頭尤悍黠擬官僭號
益增機險守仁休士歸農若不復用兵者至明年先計
擒賊魁遂進兵擊其懈連破三洞乘勝逐北滅巢二十
八俘斬三千餘還師開縣置官司堅明約束諸賊藪盡
爲治境虔吉人皆立生祠歲時以祀十四年六月宸濠
反守仁適勘事福建道經豐城與縣令顧泌指心籲誓

廣名將傳卷二十

明

三

海山仙館叢書

不與濠俱生急馳小舸返吉安與知府伍文定謀起兵
討賊發檄召江西知府邢珣等又密遣諜四出投檄揚
言京師及湖廣東西南京淮安浙江各發兵共數十萬
以疑宸濠使不敢出南昌賊疑四路兵至不敢出遲回
半月餘乃出南昌攻南康九江安慶而守仁之兵則已
大集矣卽傳檄罪宸濠遣人密書與賊心腹李士實劉
養正及閔念四吳十三若有約內應者宸濠得致書人
及書遂疑士實等士實等勸宸濠去安慶直趨南京否
則徑出蘄黃趨京師宸濠不聽守仁遂進兵攻破南昌

擒其居守宜春王拱條及宸濠子三哥四哥時宸濠正
攻安慶聞而解圍回顧巢穴守仁迎戰樵舍縱火攻之
大破賊擒宸濠及其子大哥宸濠既擒江彬諸奸遂導
上南巡下詔親征時宸濠未死諸奸佞皆通宸濠得金
錢者多在上左右頗有異謀而畏守仁不敢發惟百計
欲去守仁而守仁深機曲算內戢凶倖外防賊徒撫定
瘡痍激勵將士日夜如對勁敵宸濠竟得伏誅內閣大
臣素惡王瓊因忌守仁以提督軍務得專制召兵及平
賊歸功瓊久之不賞至嘉靖改元始詔錄守仁功封新

廣名將傳卷二十

明

三

海山仙館叢書

建伯兼南京兵部尙書未幾丁艱去服闋竟不召讒謗
益起雖封爵賜號竟不與鐵券一時勤王有功諸臣中
傷廢斥殆盡嘉靖五年岑猛反兩廣聚兵討猛猛死田
州而其黨盧蘇王受相結再叛益發四省兵嶺南大困
因起守仁代姚謨守仁至開示恩信班師撤旅蘇受等
自縛來歸守仁溥示其懲因遣歸田乃諭蘇受等朝廷
宥爾宜有以報皇恩衆皆頓首願效死時八寨反側久
毒嶺表守仁因密與蘇受約又會保靖土兵自嶺南還
因密與領兵官約過八寨當與蘇受等兵相犄角徑搗

其巢或遏其前或截其後或張左右翼夾擊之誅斬萬計而八寨亦平桂萇素忌守仁言守仁挾詐專兵時守仁病乞致仕至南安卒桂又言守仁擒宸濠攻城紀律不臧奏捷誇張已甚及斥守仁學術不端壞士習乞削奪官爵上憐其功但停恤典子不得嗣封而已

斷曰

從來大功扼于羣小若無機權性命不保守仁高賢江彬大狡同立一朝自傷酉卯劉瑾龍場已陷於早宸濠之功豈容直表上已南巡羣奸矯矯或曰縱之

廣名將傳卷二十

明

古

海山仙館叢書

或曰重討若觸若違事定顛倒婉轉托人始不紛擾封伯雖遲聲名自好

楊銳

楊銳字進之其先徐之蕭縣人也爲人機警宏治中代父官羽林正德四年總江西十二衛所儲運艍艘聯屬比之陣法加嚴運無後期凡八年進署都指揮僉事奉簡書守備九江安慶諸郡駐軍皖城求余闕城守事曰今日當不足憂也九年盡獲江賊于蓮花洲監司喜以事上聞銳曰江賊奚足憂所慮者豫章耳意指寧濠也

又謂九江爲鄱陽上流遠不可恃湖口最要害當以中
左所之一旅移置戍于湖口縣之高嶺便于遠望有警
可卽達也因繪長江圖具事標識凡數本呈南京機務
司馬重臣及臺院司防江者又請造戰艦若干艘習水
戰于江上至十四年寧濠變作卽告變京師先引軍設
鉤距于江側禁勿泄及寇至船二百餘艘抵岸皆爲鉤
距所破繼至者以千數銳坐城上與衆誓剿逆當得大
功又告郡守張文錦俾發府庫金懸以示賞有寇緋衣
者稱凌十一欲先登銳引弓中其首其子繼登又引弓

廣名將傳卷二十

明

五

海山仙館叢書

貫其吭而死于懦者皆起城上建大旗書剿逆賊以
壯士氣有安慶人僉事潘鵬持黃紙衣緋擁騎至城稱
後兵數十萬能以城降得不死銳語鵬曰汝死已後尙
覩顏爲悖言乎吾刃至矣捕鵬家一人腰斬棄城下鵬
乃遁去寇爲敵樓數仞向城有甲冑者出闌楯外持鉤
距大呼銳發矢中其左腋藥火齊發頃之樓燬死者不
可計宸濠船泊南岸聞不克大怒率衆分攻各首舉木
爲蔽攻甚急銳乃裂方布覆紙裹藥火千數散置所蔽
木上火發盡棄去火光周匝不絕寇無所遁寇又于北

濠結木爲棧與城接挾兵而進城中大驚銳曰事急矣
乃詭以大將軍火銃實石被緋金鼓置城上向寇寇兵
望見遂大潰銳乃潛使一卒從間道出燒棧絕且暑甚
渰賊力憊夜斂睡去銳募善泅者數人於船中聞鼙聲
卽斬首絕其纜放之江中又遣一二強卒突入岸上營
舉火礮城上應之乘勝捕殺聲震數里是夜宸濠浩歎
出涕舉帆順風而返捷聞武皇下璽書褒之曰十八晝
夜勞苦可嘉朕心大悅又賜有忠勤報國並戰守奇功
二榜實授都指揮僉事充參將仍守安慶兼湖廣地方
衣爲葬

斷曰

楊銳羽林代父總轄儲運艦艘比之陣法運無後期
九江駐札獲賊蓮洲監司目刮銳曰無然豫章宜察
固請移師湖口鎮壓又先設鈎以待賊發及賊來時
盡爲鈎殺射賊勇施焚樓威雜銃石齊加碎兵穿甲
敗走宸濠捷音上達賜璽書褒男兒志答

仇鉞

仇鉞江都人也世襲指揮同知驍勇敢戰正德五年寅
鐔反鉞陷賊中京師訛言鉞從賊守備保勛又與賊聯
姻疑爲之外應李文正曰鉞必不從賊勛故姻耳若疑
勛不用則諸與賊通者皆懼而不復歸正矣因白上用
勛爲參將以鉞爲副總兵討賊命下勛卽上疏言臣母
及妻子俱在賊中臣義不顧家恨不飛渡黃河食賊肉
謝朝廷鉞聞命亦稱病臥陰約游兵壯士候保勛楊英
諸兵至河上乃從中發爲內應俄蒼頭書童沒河潛入

廣名將傳卷二十

明

七

海山仙館叢書

見鉞言諸兵已至河上列營鉞因嗾人謂賊何錦宜急
出守渡口防決河灌城且遏東岸勿使渡河錦果出而
留賊周昂守城鉞又稱病亟昂來問病鉞猶堅臥呻吟
言旦夕且死蒼頭卒起捶殺昂斬首鉞起披甲仗劍跨
馬出門一呼諸游兵壯士皆至遂奪城門擒寅鐔充總
兵寧夏封咸寧伯食祿千石與世券方寅鐔之變朝廷
遣張永同楊邃庵將兵出討邃庵謂永曰寧夏事不足
平仇鉞在彼不久當有捷報至是果然蓋鉞自列校楊
公識拔以起者其早受知于大賢如此

斷曰

仇鉞指揮忠勇奇特偶陷賓鐸訛言從賊皎皎此心
一時誰白楊李知人反令討賊鉞因稱病形之聲色
俟兵至河假爲畫策恐掘灌城賊皆驚出崛起奪門
反正頃刻方知其忠凜凜赫赫食祿流芳何可多得

戚繼光

戚繼光字元敬定遠人幼而裨闔多權術英風勃勃既
冠奉父命襲世官待次司馬門有善相者目逆之曰將
軍三十六秉鉞專征不五等則三孤矣庚戌倭入大人

廣名將傳卷二十

明

大

海山仙館叢書

繼光條上便宜部當其議又有推轂者遂進官備倭都
司尋轉浙江都司會倭難時作繼光因上練兵議其略
無兵而議戰猶人無臂而格于將乃今烏合者不張徵
調者不戢吾不知其可也聞義烏人其氣敵愾其習慄
而自輕其俗力本無他宜可鼓舞及今簡練一旅可當
三軍督府乃檄繼光亟募三千人假以節制繼光則以
爲什伍起于邱乘兵寓于農但西北地夷宜得地利南
而走險不利並驅乃間長短兵夾振而進隊立一人爲
長偏則伍之兩則什之犄角互張攻距擊刺互用名鴛

鳶陣居無何卒服習矣督府請補東參將分部台州既而島夷入台州觀旌旗皆辟易所向以全取勝其年江西告急督府檄繼光西行既捷露布以聞軍聲益振頃之聞寇張甚分壘爲三宿一據橫嶼一據牛田其酋長壁莆東南出沒焚掠因而塞路沃野不耕廣叛兵乘亂出入藐若無人繼光以督府命部兵八千往自橫嶼趨牛田俘馘立盡他夷部繼至截先登者五之三其二突圍南奔窮追絕跡勒功平遠臺而還隆慶初敵陷石州用廷臣議召繼光入策備邊繼光因上書陳七原六失

廣名將傳卷二十

明

九

海山仙館叢書

四弊大畧謂兵制西北什倍東南敵憑積威劫邊人人望風而靡戰將率敗軍費參外家兒視敵飽歸尾而鵬剿掩老弱爲功借曰當戰鮮不唾之且不練何以議兵無兵何以議戰練兵之效臣嘗驗之東南請簡部將若而人分出三輔州縣再部募三千丁壯部將將之合爲四營營各五部每營立一裨將爲之連衡總攬折衝主將則專制簡練訓習一如東南比及三年堂堂乎可格敵矣長驅出塞務令咋指而避窮廬設有警則大舉討罪之師逐北而虛大漠然後屯田足餉罷戍銷兵坐

致富強則百世之利也部持可否未決既而有言太阿之柄不假武人而練兵之議寢矣既而又議築臺督府上其議許之不旬日告成功又議立車營出戰則以代城郭首分數次形名次技擊次步伐次偵邏次鄉導次批搗次遮擊次追襲次俘馘軍政畢張無不以律比年東西俱謀人犯自繼光修內備不戰而伐膚敵卽軍正無所課功其功上上時江陵當國上遣右司馬出行邊大閱薊門十六萬之師畢至營伍必整旌旗金鼓必齊約束必堅號令賞罰必信驗諸械器必精履諸關隘必

廣名將傳卷二十

明

三

海山仙館叢書

周比還報悉以狀聞因以備遼功進左都督加秩少保及江陵殤人言波及少保忌者復陰布蜚語始移鎮南粵未幾敵入黑峪關薊人願亟召還不得請則勒石頌功德而尸祝之繼光度嶺南疆事如二鎮踰年疾作得謝還以丁亥臘日卒

斷曰

繼光將軍生殊不偶五等三孤是其所有推轂備倭東南是守因練三軍短長互紐南北並驅利于險走陣名鴛鴦可暫可久分守浙東島夷時吼覩威旌旗

辟易海口因而誅之獲訊獻醜檄救江西到卽斬首
再往牛田俘馘不苟敵陷石州召光入部因請練兵
以爲利藪再請車營以爲不朽部議持之唯唯否否
江陵遣觀方窺八九少保加榮勲名山斗

沈希儀

沈希儀其先臨淮人也世襲廣州馴象衛指揮使未弱
冠已能馳馬手縛賊征永安盜誤陷淖中騰而及于岸
三酋前趨之一鏢一刀一弩並發希儀捩項以過鏢排
右足讓刀顧射鏢者中決項死因掣刀斫刀酋於磴間

廣名將傳卷二十 明

三

海山仙館叢書

斷其頰死又射其弩酋竟却其追兵而還遷都指揮僉
事務浦賊八千人行剽歸倉卒部五百人往扼之蛟龍
滑石兩灘相去數里希儀曰滑石灘狹難行引繩乃濟
雖衆可薄也蛟龍灘濶衆行成列難圖矣吾欲奪其濶
而致之狹因伐岸竹編筏以爲線頃刻成數百旗挿之
蛟龍灘令羸卒數十人守之以疑賊賊果疑而趨滑石
且半渡伏發擊敗之嘉靖六年岑猛叛督府召希儀與
計曰歸順岑璋猛婦翁也助猛奈何希儀素得土官陰
事因答曰璋女失寵而璋心恨猛貌合耳可使擒猛何

謂助乎督府復憂猛乘上流勢擁兵下如建瓴邕梧危矣希儀曰是不足憂土官大率飽富貴戀巢穴所爲叛者懼誅耳豈有遠志乎督府又慮猛走交南希儀曰猛走交南則閉不能歸彼豈無慮哉於是分五道進師希儀將中哨當工堯工堯隘而糧盡乃潛渡江詣左哨將乞糧請並兵攻工堯左哨以分地爲辭希儀笑曰兵糧吾自足試君心耳還夜分兵三百人繞出工堯背煮餘糧爲稀糜食士合戰戰疲力而所遣三百人則已立幟工堯山頂矣賊見而大罵遂逐入隘得其積粟勝軍乘

廣名將傳卷二十

明

三

海山仙館叢書

攻田州歸順岑璋素信希儀使圖猛因遣兵二千陽助猛又精兵千人名護友實則爲間官軍得工堯猛出走則擁入歸順左哨將知之兵壓歸順境索猛歸順斬囚首以獻而先一日希儀已獻猛馘梟軍門矣督府議設流官希儀曰思恩設流官反側至今兩賊行合從且復起不見聽而田州果叛後竟復土官田州乃平擢石江參將石江故治柳州柳在萬山中城外五里卽賊巢前守劉璉殪于賊訶者耳目徧官府閭閻中稍動色賊在溪洞數百里趨知希儀至顧令熟徭恣出入嬉遊城中

而求得與僑通商販者數十人厚撫之使爲詞於是賊動靜聲息往往爲我所先得所鵬剿風雨來去每出剿卽肘腋親近不得聞至期鳴號則諸軍立集聽令曰出某門旗頭卽引諸軍貿貿行問旗頭旗頭不知也頃之劄營賊衆至戰方合而伏左右起賊大敗去已而賊寇他所官軍又已先在雖絕遠村聚賊度官軍所不至者寇之軍又未嘗不在賊驚以爲神卽官軍亦不知希儀何以得之所鵬剿必其劇巢縛管繩爲記無妄殺於劇巢得婦女牛畜果隣巢者悉還之惟陰助賊者還軍立

廣名將傳卷二十 明

三

海山仙館叢書

勦曰若奈何陰助賊乎於是賊驚服無敢陰助賊嘗欲勦一巢乃佯臥病所部人問病謝不見再入問希儀始起曰吾病思鳥獸肉若輩能從我獵乎卽起出獵去賊一二里而止營衆乃知其非獵也因攻巢擒其尤黠猾善戰者支解之四懸城門見者股慄常以甚雨淒風天冥冥夜察諸賊所止宿散遣人齎火若礮衣毳帽與草同色潛賊巢中夜礮舉賊大駭曰老沈來矣挈妻女蒲伏山頂兒啼女吡往往寒凍死或觸崖石死妻子相怨汝作賊何利至此及明詞之則寂無一人所散遣出他

巢者亦然他巢大驚已相聞則愈益驚陰誦之則老沈固在參府不出也自此賊膽落或易而爲熟狺熟狺旣伏希儀威信調征他巢雖懼爲仇不敢不往論者以爲廣西之將前此未有也思恩已設流官忽聞岑濬有子曰金在鎮安人情洶洶而賓州酋楊雷卑辭希儀曰雷小主人在請往希儀暗思金去賓迨而雷應之且爲賓州憂賓州危則廣右之咽喉立梗矣乃婉言好語謂雷曰金是岑濬第九子耶我往征田時固聞之復沉吟作自語狀曰岑氏其復乎欲以深動雷已而呼雷入密室

廣名將傳卷二十

明

三

海山仙館叢書

要賂爲金復官雷乃大信且出復呼入曰韋貴徐五今分將思恩必仇金須善防之於是金果將五千人因雷以見門者懼走報請無納希儀罵曰金本土官子非賊奈何不納則引入厚結之又引以詣兵備隨盡散其五千人卒縛金而思恩復寧當是時非深計則賓州幾失瓊南五指山熟黎本馴順畏法知府邵濬者黷貨虐使之而黎叛兵八年不休希儀言于督府曰法家斷獄必分首從今諸相煽從逆者如虎投阱勢不可不釋並諸夷而剿之則傷仁撫而剿之則墮信莫若獨搗其首惡

首惡平則諸異志者褫魄矣是公以生賜萬州也都御史聽之而黎平進都督同知改貴州入銅平巢作用甚奇然秘不告人人亦莫知也希儀膽勇機警善撫諸人爲耳目者賞不失頃刻嘗染危病所部卒至自戕于神前以禱穿手刺股痛毒諸體者皆遍最後一人至以箭穿喉其得士如此

斷曰

沈子希儀英雄之器勇悍既殊復多智計陷陣殺酋直如兒戲狹路邀誅其來若繫岑猛何強驅而就斃

廣名將傳卷二十

明

奎

海山仙館叢書

擢守石江柳州之地徧地賊巢耳目甚細儀僞不知任徭游憩借徭探徭轉爲我利突勦如鵬不知其意凡賊所攻官兵先備賊驚爲神因而失勢誰知勦誅皆有管記忽聞岑金在賓復繼賓酋楊雷因請往肆伴借復官誘而相棄思恩兩平進官榮世

李善長

李善長濠之定遠人少有志計慷慨好功名粗持文墨里中推爲祭酒元末劇盜起汝潁間淮南北豪傑多起應之善長心薄之不出會高帝爲濠州帥以兵畧滁陽

善長被儒生服道謁上素聞其名禮之與語取天下大計輒合通夕恐旦遂收以爲掌書記而從容謂之曰大帥與諸校不能相肺腑者皆持牘者市權而行怨使下不得上心上不得下力以致敗也善長頓首曰命之矣於是諸將來歸必爲上布款誠皆使得自安遠近日附上鎮和陽而元衆猶盛每分營侵軼上欲出復雛籠山寨畱少兵佐善長戒曰敵至謹自保而元謀知和陽守兵少亟來襲善長設伏兵大敗之捷聞上大悅曰誰謂而厖厖握算此役幾令執戈者屈之矣因謀渡江善長

廣名將傳卷二十

明

三

海山仙館叢書

曰兵衆食少舟楫不備不足以爭江左利姑族之會巢湖將俞通海廖永安等以舟糧來歸或疑其詐善長亟說上曰此天贊我也機不可失上從之遂拔采石乘勝取太平善長預置榜諭士卒有擄掠者必斬太平甫下卽懸之五父達肅然無敢犯上爲吳公而善長拜參議與宋思顏李夢庚郭景祥陶安等俱爲省僚而軍機進止十九取善長處分上益禮重之凡師行善長必畱守轉運兵餉無乏而將吏帖服居民安堵等奉上爲吳王超拜善長右相國僞漢平善長請權兩淮鹽立茶法制

錢開鐵冶定魚稅諸利雖若煩悉而裁取有衷民不以爲困而國用益饒旣而吳亦就平乃力請上卽帝位曰殿下提三尺劍不堦尺土而成大業比肩之孽剗削且盡不以茲時正位號何以慰海內心上曰吾居恆笑友諒甫得一隅而黃屋左纛卒以畀我我安得復効之令後人笑也天命果在我自有時毋庸汲汲平吳皆大將軍功上以善長有轉餉勞召見戟門封宣國公賚賜如大將軍上之初渡江頗用重典法有連坐三條善長固請除之旣而命與劉基等悉加裁定律令成賞賚有差

廣名將傳卷二十 明

三

海山仙館叢書

善長復偕羣臣勸進凡三表乃許上幸汴梁命善長居守者三月一切聽便宜行事尋奏定三部官制及官民喪服朝臣服色俸賜天下嶽瀆神祇名號封建藩國功臣爵賞事無鉅細悉委善長謀之三年大封賞上謂善長雖鮮汗馬功然給足軍食其功甚大進封韓國公特進光祿大夫左柱國歲祿四千石子孫世世勿絕賜鐵券身免二死子免一死詰詞比之蕭何云

斷曰

善長文墨目能識龍會元喪亂儒服歸從商籌大計

對合針鋒授掌書記宣布恪恭師出室懸敵乘進攻
用奇設伏大敗元兇整旅渡江計食緩縱巢湖糧歸
衆慮蠱蜂亟言於上天贊我公長驅江左榜諭士農
軍政肅然輸餉足供充裕國用裁取中庸固請正位
三表乃從奏除苛法定律建封比之蕭何爵祿萬鍾

鐵鉉

鐵鉉鄧州人洪武中由國子生授禮科給事中奏對詳
明上喜賜字鼎石屢決疑獄建文初擢山東參政北兵
起李景隆將兵駐德州鉉督餉繼之不乏景隆軍敗南

廣名將傳卷二十

明

天

海山仙館叢書

奔鉉收潰卒保濟南北師至圍城數匝百計攻之屹不
可破城攻壞者立築之恐爲所乘先以藍布大幅灰紋
其上如甃石狀張於外北師遠望驚以爲神遂不敢逼
內得潛爲繕完忽又盡撤守具出千人城外伏地請降
因懇退兵十里無驚動城中人燕王大喜謂諸將曰得
此可斷南北軍中皆呼萬歲卽下令退軍受降鉉乃暗
懸鐵板城門上伏壯士闌堵中約候入城呼千歲卽下
鐵板拔橋因遣人請王入撫諭王渡橋至城下門開王
將入門內羣呼千歲鐵板亟下僅傷王馬首王大驚急

易馬回走至橋而橋下伏兵已斷橋燕王急乃躍而過
怒令合兵圍城鉉令軍士辱罵北兵大怒攻益急以礮
擊城城震欲崩鉉因書高皇帝神牌遍懸危處北兵見
之遂不敢擊久不能克姚廣孝曰師老矣舍之南去宋
參軍說鉉曰北兵南去北平之守單弱可襲而破也北
平破北兵回顧家室合南兵進躡之大難旦夕平耳鉉
曰城守三月士卒困甚而南將皆驚材無足恃者莫若
固守濟南使江淮有備北兵不能越淮歸必道濟歸而
邀擊之全勝計也既而北兵攻東昌鉉援之大戰城下

廣名將傳卷二十 明

元 海山仙館叢書

斬燕大將張玉事聞進兵部尙書北師至宿州鉉大破
之於小河斬驍將王真中原震動燕王將北還以諸將
力諫於是決計南向再戰得大勝遂長驅渡江鉉感憤
欲自裁及文皇卽位鉉猶擁殘兵駐淮南規圖興復而
大勢已去被執至京背立庭中正言不屈令一顧不可
得割其耳鼻竟不肯顧藝其肉納鉉口中令啖之問曰
甘否鉉厲聲曰忠臣義士肉有何不甘遂寸磔之至死
猶喃喃言不絕口年三十七父母海南安置子皆戮死
妻女發教坊妻病死二女終不受辱同官以聞乃赦出

斷曰

鐵公名鉉忠瘁英英督餉不乏收飭潰兵嬰城自矢
礮燄傾橫幅布外張繕築完城密誘入穀將次功成
悞中馬首脫易驪竄進攻益急牌懸息征休養待勞
東昌捷贏天心何有勢矢孤鳴割蕤問甘忠何懼烹
芳名千古雖死亦生

程濟

程濟朝邑人有奇術以明經爲岳池敎諭岳池去朝邑
數千里濟寢食朝邑而泊岳池學中不廢建文初上書

廣名將傳卷二十 明

三

海山仙館叢書

言某月日西北兵起朝廷謂非所宜言繫至京召入見
將殺之濟仰面大呼曰陛下幸囚臣至期無兵臣死未
晚遂下獄已而果兵起赦濟爲翰林編修充軍師護衛
將比行徐州之捷諸將樹碑敘戰功及統軍者姓名濟
一夜潛往祭碑人莫測其所以後文皇過徐見碑大怒
遽以鐵椎椎碑再椎遽止曰爲我錄碑文來已而按碑
族之濟名正椎脫處得免濟初與同邑人高翔並以明
經徵翔厲名節濟好術數比兵起濟勸翔學其術翔曰
吾願爲忠臣也金川門破翔招濟同死濟曰吾願爲智

士也翔竟死建文急召濟問計濟曰天數已定惟有出走免難耳立召僧爲建文落髮遁去濟從之每遇險輒以術脫去相從數十年後隨建文帝至南京人尙識至京莫知所終

斷曰

程濟數術莫與其匹朝邑岳池寢食家室上天呈象越職計日震怒無稽乞囚桎梏不爽前言軍師優秩戰捷徐州論功擢筆賞夜祭碑人不知實文皇過此裂眚怒叱椎擊錄文濟名碎失數有安排免於斧鑕願爲智士致君成佛火燎平原池魚遁出數可前知關津免詰術以愚人險厄化吉四十餘年同歸故室建文功臣濟爲第一

朱能

朱能字士宏定遠人父亮從高祖開創有功世襲燕山中護衛千戶早卒能代其官爲燕王愛重嘗從王北征取元太尉朵兒不花覆其軍建文初以王強大見猜暗勅三司逮之勢且迫王欲動而猶隱其事能因與張王邱福直入倡言曰大王高皇帝親嫡子最長而賢朝廷

不察而以吳淠見疑大王卽自受吾曹亦安能坐待菹
醢也王乃決策誘執三司而起兵靖難從王攻薊州先
登拔其城擄其將馬宣又乘勝取遵化永平密雲諸邑
東畧地抵灤河還從擊雄縣後先登入東門破耿秉文
之前鋒九千人追獲副帥楊松潘忠遂乘勝直至真定
與耿秉文大軍遇能挺丈八矛卒敢死二十餘騎瞋目
大呼突入其陣所向皆解王麾衆從之遂破其陣斬獲
數萬追至漚沱河敵尙數萬能復大呼馳而躡之遂盡
潰王大悅賜書褒獎又從援北平解其圍又追敗吳高

廣名將傳卷二十

明

三

海山仙館叢書

卒二十餘萬曹國公李景隆以五十萬衆攻北平能從
王入援遇於鄭村壩力戰敗之進攻其營又敗之又擊
潰景隆兵之攻九門者景隆懼悉鳩亡散號百萬復來
攻王親拒之以能爲前鋒能馳至白溝河屢戰屢敗之
盡拔其寨柵窮追濟南復大敗之獲降萬人聞于王悉
縱歸復下滄州又進攻東昌與盛庸兵鏖戰王忽以數
千騎突出敵後襲之敵知爲王悉衆圍之幾不能出能
急奮力潰圍而入復翼王潰圍而出我大軍遂進戰夾
河大敗盛庸兵又乘勝畧彰德掩水西塞又敗敵將李

文于德州遂進克東河東平搗汶上諸寨又設伏敗平安之衆十餘萬轉戰至小河王師不利與諸將議咸氣鬱請班師能獨奮然曰漢高帝百戰百不利而竟奪項王之天下今僅一不利耳而遽旋師何也且旆一旋可復至此耶王悟乃下令曰言北者斬遂縱兵深入至靈壁敵悉衆來戰能與邱福後先登陷陣攜平安及斬馬溥徐真等三十餘將降者數十萬人遂進取淮陽而定京師王卽大位論功封成國公歲祿二千五百石賜誥命鐵券又明年安南黎氏弑其主且拒皇命詔拜征夷將軍總兵討之上親餞龍江師抵廣西而能病瘴以兵屬副軍而卒上時已覩星象而怪之曰西南其有憂乎俄而訃聞上震悼輟朝三日大臣入慰上爲洒泣曰輔我成業者能也命百官爲治葬親爲文祭之諡武烈

斷曰

成國朱能勇冠三軍數言悟主百戰成勲獲降縱歸潰圍翼君餞于龍江寵渥超羣

張玉

張玉河南祥符人驍勇善戰多智策仕元積戰功至樞

密院元亡遁于沙漠洪武十八年始自拔來歸高帝異其材以裨校從征後積戰功調燕山左護衛又以敗敵進都督指揮同知遂爲燕府元僚燕王倚之若左右手靖難師起玉首佐謀盡奪北平九門旣而議師所出咸欲南玉曰薊爲肘腋患不滅而南不安也燕王然之遂輕兵圍薊獲薊守馬宣又移兵取遵化俱有斬獲功從王南下耿秉文以二十萬軍真定衆莫測玉請單騎覘之還曰秉文不能訓衆師有敗氣急擊勿失諸將猶以兵力不相當難之玉曰彼衆而囂我整而銳胡不相當

廣名將傳卷二十 明

三
海山仙館叢書

也燕王大悅曰倚若一人足辦矣遂前薄真定果大敗其軍又從敗吳傑軍又輕騎救永平辰抵大寧午凌其堞斬大帥朱鑑又還救北平大破曹景隆之衆突騎往還若風雨復從廣昌蔚州進圍大同皆下之時諜報李景隆收散卒及後軍未傅者號百萬且至矣諸將謀未定玉復進計曰兵貴神速請急往白溝河以逸待之可勝也燕王悅而從之果大破景隆追擊至濟南東昌之戰燕王被圍王死戰得脫玉不知王所在突入其陣東西衝擊手殺數十百人自亦中創而沒王收兵不見玉

慟哭謂謂將曰勝負不足計所恨艱難之際失我良股肱耳追封榮國公諡忠顯遂以兵屬其子輔

斷曰

驍勇張玉燕府元僚佐謀收薊審敵敗囂大破景隆斬堅殞廖追封榮國青史昭昭

楊一清

楊一清字應寧雲南安寧人也幼以奇童薦入翰林憲廟命內閣選師教之登成化進士授中書舍人尋擢山西提學僉事丁憂服闋補陝西提學副使在任八年大

廣名將傳卷二十

明

三

海山仙館叢書

作士類召爲太常寺少卿轉南京太常卿時因邊警馬政廢弛遷右副都御史督珉茶馬清出荒熟牧地十二萬八千四百七十三頃招商自出資本買茶裝篋轉運茶司每千斤價五十兩大約計官銀萬兩舊買不過千匹若此可得馬幾三千匹其利在官與閩中商茶不同至今以爲便警作大司馬劉大夏薦爲陝西巡撫兼理邊務劾罷總兵武安侯及兵備不職者數人請釋守備楊宏使自劾裁抑鎮守中官支應歲省數千金繕城濬河而緣河一帶備嚴敵不敢渡己丑冬敵以數十萬入

寧夏乘勝直抵固原一清率帳下五十餘人趨會總兵曹雄衆遮道爭不可以謂平涼一路絕無行人參政安惟學曰公行何恃一清不答去而敵聞一清至遂掣衆北走在陝未踰年百務具舉正德改元以邊患方熾兵權大分命總制全陝三邊軍馬一清以寧夏花馬池要害敵數由以入率官屬沿邊巡視疏陳戰守之策修築垣塹以固邊防增設衛所以壯邊兵經理寧夏以安內附又上數事忤劉瑾歸休丹徒復逮詔獄大學士李文正救免會慶藩竊叛起爲總制靈州土人素苦漢官科虐一清昔時多所釐革至是踵舊遂紛相訐訐一清以大亂之後但除其害而不究其人因訪求各營衛部領之賢否而更置之又謂邊軍之困本由科差煩重而私役買閑爲弊居多屯軍地去糧存逋逃萬數而湖地草灘半爲將領所據以自封植於是各守黜役退占又稽查軍士實數造冊在官凡有徵調及雜差者循次撥用遂通行各城堡一體查處禁革修數事乞旌死節之家如楊忠李睿張欽等宜蔭其子多與劉瑾不合絕不少顧又奏總兵楊英喪失之餘士心不附宜取回調用

復薦仇鉞保勛史鏞等時延綏巡撫奏敕諸鎮搜索河套散賊一清疏謂漠中流賊未平調去沿邊官軍數多邊城虛空糧儲缺乏而河西勁敵屢行搶攘况河凍後敵若入套各鎮兵馬正當蓄鋒養銳以俟今乃無故出境搜索縱得數輩老弱殘敗餘寇何補于事且往回動經旬月靡費糧草傷損馬匹所得不償所失又遺書當道極論其事乃寢瑾素憾一清因倉卒起用今見警息欲矯詔削其權事發伏誅踰月召爲戶部尙書尋加太子少保時順天應天山東河南江西盜起疏陳切當爲

廣名將傳卷二十 明

三

海山仙館叢書

上嘉納改吏部遂起廢拔幽凡爲逆璫構陷者連茹以起又陳戰守撫馭賞罰機宜下兵部檄諸鎮施行兵部王敞束手無策一清遂推用大將征討及文臣有才望者提督軍務又著令有能擒斬盜賊三名顆者陞一級有都御史馬中錫總兵張偉同征專主招撫賊不畏憚放縱肆掠又渠魁劉七屯兵要赦廷議將從一清堅持曰中原百姓敢稱兵熾亂罪在不赦宜易增兵殄滅乃已命太監谷大用總督軍務薦侍郎陸完爲提督授之方畧以拯溺救焚爲念率西北勅兵半駐江北以爲聲

援半渡江南以備截殺一以壯金陵之保障一以爲瓜
眞二壩之防又云賊出沒無常奔淮揚通海二州以趨
山東畱淮鳳之兵而山東自固矣未幾盜平獻捷卒如
其畧加少保入內閣以時事多乖又因災異自劾疏入
錢寧銜之遂謝政宸濠變起一清以林居疏薦王守仁
知兵又以鎮江爲江南首郡此地有備三吳無虞遂親
閱城設險出粟賑軍乃調金山鎮海官兵爲外援設中
軍營爲內應故城內外恃無恐武宗南征幸其第君臣
宴飲賡歌詔幸武林一清婉諫遂不果行嘉靖四年再
起總督三邊後因霍韜上疏毀一清上疑之遂乞歸

斷曰

楊公滇人幼具奇名恩寵獨隆羣英敎成文生五彩
武著九京茶馬得治荒熟牧平敵臨數萬單騎縱橫
先聲畏走奏凱回旌修築設衛戰守皆精求賢剔弊
旌節死榮止索餘寇裕國庇生起廢拔幽濟濟棠貞
掃氛滌穢羣盜肅清宸濠叛逆薦賢知兵設險預備
三吳不驚武宗幸第詩酒和賡諭幸西湖婉諫尼行
再起督邊朝野歡聲

廣名將傳卷二十 明

吳 海山仙館叢書

俞大猷

俞大猷其先鳳陽人世爲泉百戶大猷髫髻時卽倜儻以豪傑自命父卒襲官學騎射從李良學擊劍盡其術益常山蛇勢以爲兵法數起五猶一身五體雖將百萬之衆固可使合爲一人也嘉靖中會舉高等以千戶守金門上書部使者言兵部使者呵辱之奪官大猷笑曰此豈我自見地耶遂盡鬻其家游京師以書干翟侍郎鑾翟得書驚歎禮之驚一軍然終不盡用遷廣東都司會安南叛人欽廉爲寇諸司議募陸兵大猷曰賊由海

廣名將傳卷二十

明

三

海山仙館叢書

來當以海舟破之若專備于陸賊舍此擊彼我不勝其備賊不勝其擊彼逸我勞非計也乃多集海舟連破之永安萬寧而安南函賊首以獻矣倭難作大猷以南直副總兵戰賊平望王江涇六金壩皆連捷而提督張經以視師趙文華言論死大猷因之坐落職奪祖官旣而東南之禍日亟復大猷浙江鎮守而大猷言防江必先防水水兵急于陸兵蓋倭奴長陸戰令樓船高大集萬銃其上倭船遇之輒摧壓焦爛因我兵所長也善戰者毋以短擊長而以長制短且海船無他法在知風候齊

號令以大舟勝小以多勝寡耳於是用舟師戰而舟山積歲不除之賊皆剿矣盜王直者徽人也以亡命入海據烈港勾倭貿易爲逋逃主天子以連歲倭變皆內誘責督府胡宗憲令必得之以自効宗憲因誘之大猷言直在海島非以繪物誘倭來在彼國則一逋逃夫耳倭之來不來非關直之誅不誅也若誘之來而殺之則失信且何以示後盍請諸宗憲不聽誘以來天子聞得直則大喜命誅之于是宗憲恚失信怏怏曰吾爲俞帥笑矣而羣倭聞殺直焚舟殊死戰大創入掠閩宗憲懼乃

廣名將傳卷二十 明

四
海山仙館叢書

奏言大猷違節制不窮追以爲解而大猷逮詔獄戍邊未幾饒平民張璉反流陷江閩諸州縣詔宗憲兼督江廣合諸道兵二十萬討之而大猷遷南贛將宗憲聞璉出行劫下檄言賊棄巢出此自投死其速擊大猷前以違節制見劾得罪欲言恐禍及欲不言恐敗事已乃曰吾豈以一身之禍忘國事哉乃具言璉雖離巢出劫其妻子財寶乃在巢若我以大兵迫其巢彼必聚眾自救譬之虎方逐鹿熊據穴而搏其子虎安得不置鹿而還還而蹙之如拉朽耳且三省會擊有期又豈可以數萬

之師從一夫團走哉于是以兵萬五千人疾走栢嵩嶺
瞰璉巢璉果歸保巢而大猷出擊俘斬者千餘乘勝潛
使說璉黨執璉已意兩廣帥所奪或請訟之大猷曰賊
惡其不滅豈必在己翌日班師不殺一人以示信陞副
總兵加節鉞命控制江湖閩廣四道兵加祖官一級會
倭陷興化大猷自贛晝夜馳赴而戚繼光浙兵尙未至
時上怒督府失泉城責戰急而閩士夫又洶洶急功大
猷念賊且萬人能戰入死地官軍數僅相當若迫城攻
之彼實我虛彼飽我飢彼逸我勞一挫而東南之事去

廣名將傳卷二十

明

望

海山仙館叢書

矣不若列營以困之彼欲攻柵以遁則彼虛我實彼勞
我逸彼飢我飽而我師犄角馭之可使無孑遺且速戰
勝亦可遁負亦可遁此賊之利也遲則我兵日多賊日
益困蓋敵以戰爲守我以守爲攻於是星布兵營畫地
鑿溝令東西通而列柵其上賊挑戰不動已竟殲賊諸
將各加秩而大猷止賜金幣蓋閩士夫詬病其緩已流
言聞之朝矣倭三萬寇潮州與盜吳平相犄角爲廣惠
詔移鎮潮廣羣盜畏大猷名競出降吳平雖不能堅然
亦詭殺倭自効遂與倭人絕於是大猷請于督府吳桂

芳曰陸賊以出邊爲生路山賊以歸巢爲生路今潮兵驅賊益深益深則益以鬪耳是死路也當大集精兵十圍五攻無使片甲得還如兵力單砦不勝不散之令得遁去則遷曠日久而勞費無已也于是將漳兵二萬以來果破平而御史以招平爲大猷負坐免官吳桂芳抗言于朝乃得雷二源山袁千里賊據洞如蜂房水窩介三郡六縣之間而雲溪尤固大猷曰此當誘而聚之者也遣王鸞者盛驪從充裨將爲死間賊得鸞自安而大猷日發兵擊旁諸巢之未下者以趨之諸巢果畢集雲溪以緩討乃陽言誅李明過雲溪巢賊出牛酒犒兵須臾兵悉集擊破之於是賞先登酬死間而東峒遂平桂芳上其功云董五哨十萬之全師如奕棋着着先手剪三郡六縣之妖逆如振落次次剗平以爲方叔元老之猷云

斷曰

大猷爲將事必先周陳師鞠旅言必盡謀水滅倭氛陸俘璉囚閩廣莫安漳泉少憂比之方叔實稱其儔

廣名將傳卷二十終

廣名將傳卷二十 明

聖

海山仙館叢書

